

諸
既
詩
英

第
四
冊

諸
既
圖
書
館
—
ZHUJI LIBRARY

者
登
詩
英
讀
編
卷
四



諸
暨
圖
書
館
— ZHUJI LIBRARY —

六
四

諸暨詩英續編卷四

邑人徐道政病无輯

蔣智由

字觀雲舊名國亮別號因明子澣山人光緒癸卯順天舉人應經濟特科授山東曲阜知縣不赴按先生讀書求志慕諸葛武侯之為人學貫古今中外早歲肄業杭州紫陽書院文名久噪見中國衰弱有革新之志世不見用乃隱居日本與梁任公等辦新民叢報眷念故國不忘生平著述甚富文本史漢而運以韓蘇之氣詩宗李杜而不落中唐以下嘗與余論詩謂學杜不可用杜一字學韓亦不可襲韓一字故能戛戛獨造瑰偉絕冠於當時梁任公詩中八仙歌首云詩界革命誰與豪因明鉅子天所驕其推崇至矣先生又謂詩與日俱進昨日之所是今日視之則非矣著有居東集行世又詩二卷未付印

梅花

窮冬凋萬木破寒梅先發如當守舊時犯難陳新說陽春忽以至四野生
 光澤灼灼桃李花青青楊柳色造物豈不仁四運遞回斡玄冥氣方驕句
 芒已回轍洒然六合間和風動閭闔及茲散凜威吾與物俱樂既樂亦太
 息俯仰思宿昔數枝早梅花偃蹇鬪冰雪

男頌頹楚樵校



好山

平生慕至遊好山為余樂年少尚奇峻峯峯踏吳越及長意未衰所至尋
 邱壑古云蓬萊山高浪連天感仙人所往來金銀麗宮闕余遊時俗棄竄
 身東海曲手把扶桑枝滄浪濯我足徙倚方丈雲嘯傲員嶠月翻覺世路
 隘差喜天宇闊獨有故山心展轉不可撥白雲從西來了知是鄉國中夜
 夢還歸身飛遶五嶽

天道

惡寒天久寒惡雨天久雨惡人多壽考富貴而強侯共工觸不周西北傾
 天柱賴有五色石媧皇煉以補孔子定人倫大禹平水土焜煌世間業皆
 由前聖樹所嗟人力微填海以蟠羽終令天地間缺憾長如故
 惡寒天久寒惡雨天久雨氣運有循環未可使咒詛盜跖肝人肉從者溢
 齊魯原憲翳蓬蒿世人棄如土道喪自人心未能諉氣數由來天人際惟

聖通其故惟賢默從之惟眾多疑意小子學道未不加且無吾

聖通其故惟賢默從之惟衆多疑慮小子學猶未不如且無語

甯戚

飯牛南山下祭祭見白石布衣凌夜半促縮不及膝叩角起商歌一寫深

懷鬱上有桓公君下有管仲妾

列女傳甯戚欲見桓公道無從乃為人僕將車宿齊東門之外桓公因出甯戚擊牛角而商歌甚悲桓公異之使管仲迎之甯

戚稱曰浩浩乎白水管仲不知所謂不朝五日而有憂色其妾倩進曰君不朝五日而有憂色敢問國家之事耶君之謀也管仲告以故其妾笑曰君不識耶古有白水之詩其詩曰浩浩白水儵儵之魚君求召我我將安居國家未定從我馬如此甯戚之欲得仕國家也管仲大悅以報桓公桓公齋五日見甯子因以為相

夜光終難悶神劍有時合

介之推

之推曾刳股從行伴晉文復國頌大賞祿秩不及身恥之隱綿山鳥獸可

同羣抱樹甘焚死千古為悲辛寄語有權人爵位戒勿均

爵賞者人君之大權所以獎賢進有功而即隱寓轉移風氣之作

用也勿均之於賢與有功之人則欲望人才之振興而有為國勳

力之人豈可得哉

馮唐

馮唐老猶直與俗殊便娟慷慨論頗牧不阿人主前世人皆為脂此老獨
如弦持節赦魏尚匈奴不近邊偉哉廊廟器史記馮唐傳贊可著廊廟悟主在一言
揣摩之為人害也久矣觀於馮唐則士之欲顯榮於世而傳名於
後世者豈盡在揣摩者哉

王昭君

娥眉在深宮千年誰復知空有如花貌妍媸在畫師畫師重黃金黃金非
妾持縱復持黃金行賄豈我為千載琵琶聲勁節使人悲

觀溪有憶治道書感

涿涿山中水所出同一源峭激生波濤渟湫成淵潘悟此流水意民情故
可觀逢堯人鑿井遇秦衆揭竿黃巾與赤眉操戈遍中原納之皞皞世可
如桃花源吾聞絲治水堙之益滔天禹乃反所為開鑿龍門山禹以錫玄

主絲以沉羽淵又聞召公言防民甚防川壅四橫潰民壅亦復然故水
莫如導而民莫如宣吾觀太平君仁慈而惠寬民若水在淵弗聞其為湍
季葉尚嚴武禍亂日綿綿請迴明聖駕一凭溪上欄

詠吳季子掛劍

交道貴不欺無異生死間世衰道日薄吁嗟多不然延陵昔聘晉休駕淮
徐關徐君愛其劍心許口未言顧反墓草青掛之塋樹前龍文吟夜月虎
氣橫秋煙山川陵谷變此劍無流傳惟傳君子心炳若霄漢懸隱諾獨未
寒庶可共心肝豐城冲斗牛吳冶有鏌干何似此劍奇高義景雲天不為
斫仇人可以挽狂瀾

先考忌日哭賦

哀哀蓼莪詩古人不能讀鮮民亦有親每時追懷哭憶昔倚閭門望我奮
羽翮風號木未甯高秋見永訣依依想容德故山同嶽岼常恐不肖身零

落先草木浩蕩天地恩尺寸無報答

南北東西人余也久行役故鄉日以遠音書每寥闊常恐壠頭草牛羊或
放逐不知松與楸同否前時綠秋風萬里來霜露亦已肅顧念遊子身踐
履常惻愴何時一拜倒嗚咽墓前石

吾親仗義人行善性所樂每欲推此心拯濟及民物慘淡志不成悲痛徹
心骨艸角何昂藏慰親無憂戚豈知漢落身窮老轉迂拙途窮日以暮駕
駘不可策撫茲藐藐躬永在不肖列

沛有兩異人

沛有兩異人許由與高祖許由讓天下棄之如泥土高祖爭天下殺人何
知數莽宕大澤中實能生龍虎大風鬱雲興此地陰租賦天子豈不貴至
今稱神武嶽峯箕山巔上有許由墓生時無冕旒死亦無坊斧五雲為華

蓋

五雲之下賢人隱見京氏易王勃夫子廟碑華蓋西臨藏五雲於太甲

清風為庭戶寂寥巖阿間高人自千古

出處

貧賤思富貴富貴踐危機

本南史劉穆之語

楚老哭龔勝慮此憚為犧主父偃之徒

鼎烹諒不辭疏廣既得名龍潛隱其姿歲星藏滑稽柳下不厭卑禰衡學

狂盲仲連不可鞮偏人執一義多與大道違回首觀孔孟卒歲何栖栖賈

誼累痛哭屈原摧蘭芝隆中淡泊人鞠躬酬主知甯氏兩如矢蘧玉卷懷

之莘野渭水間千古矩矱垂用行而舍藏此道復奚疑執政殆已久不獨

楚狂悲入獄以救之非我更為誰苟無兼善義獨善亦可嗤

李白贈韋子春詩苟無濟代心獨善

亦何益

人倫有大道羣己貴無虧軒冕非吾意耕釣豈余師

芙蓉

楚人放屈原遠至瀟湘汜江上見芙蓉花開照江水寧之木末間揮手萬

重綺集之為裳衣容光世無比吾亦流離者同情寄屈子天地無人處予

獨慕子美花發空山中還落空山裏吾願攜此花上登蓬壺巔天風吹飛

霞萬丈煙海間賞花高會者天外來飛仙

變國

蘭操仲尼為薇歌首陽起不忘蒼生心沈縣至沒齒吁嗟立共和民興紛
權利構黨以攘奪贊虎姿橫肆宣傳多工具毋乃欺愚椎政號歲崢嶸民
生日顛頽埽盪仁義路充塞禽獸事善名一反覆凡百隨倒置孤危不敢
言坐視成顛隕國於天地立胚胎自前史亦如萬物性各具生存理未聞
德法英政趨同一軌况我東西異文章三皇始賢聖繼綱常教化無瑕訾
工商何足多奇淫徒爾爾激增生程高逼迫貧輩死憶昔歌由庚有酒多
且旨政成樂乃作備物衆盛喜胡為趨局促錐刀競末細求生無不為奚
暇分利義遂至用甲兵山河付燬燬競爭崇邪說况益多利器甯天降薦
瘡實人富日醉維我昔先民立政與此異民什君取一力足自封已勤能
有餘羨情嬉貧自致秉政無所作賞誅賢姦耳安內而攘外端拱戒驕侈

雖有尊卑分如家人父子尊非任鷲暴卑亦無噫噉發揮個人能自鑄邦
國粹文學何燦燦餘力成諸藝大道不外求在我而已矣養生全性命秉
彝知廉恥風成道若一甯不簡且易胡為眩物質極欲窮好嗜此道乃墮
黷喪亂伊胡墜冰炭在我腸欲嘿語難止分明人心間樞機轉泰否秋風
吹衡門百昌浩將毀蟋蟀物細微鳴切動人意不寐起中夜月白星玳玳
常恨人力微無由回天地憂思千萬年不覺滂涕泗

衆棄

去鄉適已久鄉物無與同惟有候蟲聲偏喧別耳中

本孔子違山十里
蟪蛄在耳之意

我年未

二十飢走去西東汨沒遂久長飄捩如飛蓬國家方未泰感激顛心胸時
思效一死溝瘠甘所終時俗宗權強偏黨遂成風方腸不可鞫耿此是非
哀削迹爛泥沙衆棄等贖聾敢言時潮非益悚國步穹朝惟對稠書夕難
救匱饗氣稟老烈薑志勁寒秀松未信伯夷拙尚想姜父雄儀秦何足慕

邱耳庶可宗老樹絢丹葉晴壑娟青峯爽氣助興遊晴日資冲融饜喉裹
餘糧替足仗高筇暫輟時世憂一放林野蹤

木落

木落慄歲晚衣單覺秋冷枯坐衡門下散帙窮日影讀書不用世如璞永
留鑿况當天地覆生民徧獷獍袖手如在綆結舌劇含鯁喪亂救匍匐飢
溺抱痼恸嘆食動神明舞起張昭暗吾衰孔猶夢盍歸姬徒偵大君武夫
為甲兵鎮橫領國權成政業奇利操莫並舍汝舊廉恥驚此新爭競狂泉
權羣飲大囂蔑復靜蒿視人為獸國步吁其梗蓬累師柱聃枕漱非箕穎
豈有解騏驎未甘投鼃黽粗知達聖學道在能知命不見璜溪叟夢通昌
戶聖跼釣豈不賤發業起幽屏懷軫恫瘼切躬端飢寒忍歌哭不為身寢
食蒼生并庶幾善舍用企接孔顏境

梁甫吟

李白集中有此題作今仿之

按諸葛亮父為梁甫尉亮幼從父任所好為梁甫吟其後陸機沈約陸瓊李白皆作之或謂始曾子李勉琴說曰梁甫吟曾子撰蔡邕琴頌曰梁甫悲吟操曾子作梁山歌即此然世言梁甫吟者皆推始諸葛

長嘯梁甫吟誰知志士心君不見呂尚當年一老翁長跼投竿磻水中胸懷六韜藏雷雨白髮被領心正雄一旦豹隱變鷹揚九十老翁猶聰強不釣鰕鮓釣巨鼈此老意氣何其高又不見漢室之季武鄉侯天下紛紛爭曹劉隆中雖定三分策躬耕抱膝吟清秋三顧始肯出蓬廬君臣魚水長悠悠竊比管樂良不忝抱道自珍重山邱梁甫吟我有寶劍值千金楚人獻璧遭三刖白雪由來無知音鳧雁方唼藻噪喧黃鵠一舉高千尋愚公移山感夸娥夸父追日走鄧林梁甫吟國無人施媯降為爨飯婦彭咸鬻身使守門管仲潦倒鮑叔棄鴝鳥喋喋詈高辛蘭焚野火芝入圓龍門之

桐摧為薪身熱頭痛之阪遍天下寒谷吹律無回春梁甫吟甯戚且勿歌
飯牛孔子且勿悲獲麟聖賢由來天所生大旱千里待霖雨長夜漫漫要
明星梁甫吟莫悲辛

雞鳴詩 寄為家教勵早起之家法也

膈膈膊膊此何聲雞欲鳴兮天未明城頭吹角入寒雲鐘聲遠寺殷疏林
千門萬戶猶昏昏我獨巡簷喻阿申胸懷廓與天地清仰見烏鴉向我鳴
星隱隱兮欲沒月淡淡兮猶橫踟躕兮未返聞鐘聲之丁丁吁嗟乎人生
光陰能幾何百年猶似掣飛輶試看東方一輪日倏忽過半還西傾夸父
追之絕其脛魯陽返之徒虛名不如學古之聖人姬公百編為朝程大禹
亦聞惜寸陰寸陰乃是寸黃金

按阿申空氣也

武田尾 峽中

天狗之峯兀立當吾前旁薄四出連羣山兩崖竦立天貌分迫隘乃僅數

天狗之峯兀立當吾前旁薄四出連羣山兩崖竦立天貌分迫隘乃僅數丈間東巖樹交柯接葉暈翠煙朝不知紅日高幾許惟見亭午葉光篩廉纖夕不知明月懸何方惟見高峯一角射爛爛有若四山風雨至乃是溪壑之奔湍奔湍如長虹崖石忽一門倚崖度閣道坐對看濤源白日灑寒雨珠玉四飛翻其上何所有綠陰如蓋圓其下何所有澄潭映綸漣神飈自遠來木亞洪濤連飛樓盪山翠簷外叫鳴蟬溫泉出石壁玉色比澄鮮發見由樵子始自寬永年吾意此山者即為廣寒清虛之府可以來羽化之羣仙不知乃是蓬萊第幾之洞天

續雜鳴詩

咿咿喔喔向曉星夜如何兮雞三鳴有人戴月向宵征遠聞車馬之行聲車馬直入蒼茫去山陰樹影相送迎宵征非苦亦云樂令人意與浮雲輕何事東鄰人金缸明滅酣朝衾何事西鄰人日高猶未啓其門我欲起觀朝日昇迎以萬丈之朱霞環以五色之彩雲直從海底向扶桑萬里與人

盪心胸吁嗟乎吾聞之一年之計在於春一日之計在於晨鐘動猿鳴不知曙令人笑煞夢中人

天狗巖

天狗一峯拔地何巒岿我欲揮手飛行立其間翹然四望開心顏天風浪浪吹我前東海白波翻若山比叡錯落堆几案摩耶脚下紛聯翩琵琶茫茫一點綠富士雲中擎白蓮我欲西望金天聳崑崙鴻濛一氣但雲煙芝朶茫茫不可求河漢波與滄海連廬山仿像出南斗白雲蒼梧浩無邊天河不掛九芙蓉洪濤禹穴空連天斷霞赤城何處尋落日想過嵩華巔悵回首空悲哀我欲踢翻天狗之崔嵬枉自嗟峨凌浮雲誰知爾非望鄉臺

箕面山瀑布

共工咆哮觸天天為顛倒瀉千里萬里之銀河吼地裂石摧山根懸巖峩聳生濤波怪底白日飛白雪寒飈冷沫森蕭瑟轟轟何處動奔雷萬馬千

軍塵木末滔天瀕洞襄山陵息壤凡泥誰敢塞江河萬派日歸墟尾閭一

軍鏖木未滔天瀕洞襄山陵息壤丸泥誰敢塞江河萬派日歸墟尾閭一
穴爭奔洩鳥窺駭眩兮不敢下猿驚藏兮空脅息上有危巖兮將動未動
之巨石下有沈潭兮嚮嚮千尋之玉色其間景之最奇者尤在銀簾素箔
之間掩映數枝新紅葉有似玉女洗頭盆倒向天孫支機石仙露明珠碎
以飛雲錦霞裳收不得龍門波瀾江濤壯觀千古神為豪願同孔子遊呂
梁縱觀懸水千仞高郤笑伯牙至蓬萊徒聽海水汨洪飈

沮溺耦耕處

君不見黃城山乃在南陽之葉方城西云是沮溺耦耕處想像烟雲橫鋤
犁孔夫子奔齊魯困宋陳豈得如彼二子脩然物外為閒民間以渡不告
津當時與此相和者乃有丈人接輿之徒何紛紛鳥獸可羣人難羣乃欲
壞我社會國家之大倫豈知巫山火芝艾同一焚孔氏之子讀書論道辯
此大義至熟且精下士聞道大笑之譁然有如蠅黽聲我欲歌君且聽歌

曰我治我田在於漢濱獲百石穀以養一身滔滔四海孰為之耕悠悠萬
姓孰為之耘乃不如彼之車中人車中人

葉樓

旁舍柯條發春風改葉樓市塵紅到眼年態白成頭
九州平生思攬轡泣血付閒謳

塵外

揖讓風塵外拘囚土木身須文賣為活把食減支貧道得生何愁心危國

既頻

詩國步斯頻頻
謂遠崖盡處

莫嘆曹社雁應哭魯人麟

梅雨

梅熟東南雨泔泔遂至今天行雲斷續地入水浮沈草帶流荇滑堂舟泛
芥深傾乾愁不滿兼月知為淫

熱

晶雲非作雨清漢自驕陽式月愁仍熱交秋感豈涼干戈羽檄急棉稻桔
棹忙汗體酬三伏啼顏向萬方

上海寓廬

甯待營山始結廬賃檐兼土得幽鋤高桑蓋戶真成翳小竹低堦或類葵

鄙所居當樓有桑上出簷數丈余自額其樓曰高桑廬曰翳桑取左傳翳桑餓人語而適符余之窮餓於此也竹譜載葵葉薄而廣余堦下著竹數叢以葉闕似茗名則亦類於葵者歟

三代道明

書可讀九州錯鑄轍焉如平生昔昔周公夢衰甚而今復也無

非隱

近市且居殊隱倫違天不死作閒人看看一顆兩顆樹去去五年十年春
南丈荷蓀未全義西山采蕨自求仁分明孔孟傳心學憂樂為羣非此身

遠遊

遠遊明鏡兩毛斑蔣逕蓬蒿日掩關延作賓朋惟愛月澹忘言語獨看山
世歎麟鳳尼山老野牧鷄鵝太白閑昨夜無端忽歌哭蒼生來繞夢魂間

秋風

銀缸昨夜夢刀環
庾信哀時客未還
獨有秋風解公道
他鄉來伴鬢毛斑
鏡裏流光

紅樹青山繞畫樓
他鄉猶似故鄉秋
天容不變人情變
鏡裏流光看白頭
兩釣竿

羽翼風雲天下安
幽人秋水渺無端
磻溪煙雨桐江月
今古乾坤兩釣竿
鳴蟬滿樹讀離騷

西風一葉下亭皋
明鏡今朝見二毛
賸有中原歌哭意
鳴蟬滿樹讀離騷
在湯河原寄紅葉於國內友人

秋風搖落憶中原
庭樹殷紅百感翻
緘葉和書和淚寄
葉乾紅在淚痕溫
燈火殘時

燈火殘時天下白
冰霜歷盡遠山青
尼山不答南宮問
繫易貞元首六經

燈火殘時天下白冰霜歷盡遠山青尼山不答南宮問繫易貞元首六經

傅振海

字晚淵荷香坂人光緒丁酉拔貢俞曲園先生高弟也任太倉州同著有守梅山房詩四卷梅嶺課子圖七卷婁東小志七卷○按公之任太倉分州也駐紮劉河五方雜處糧幫持衆聚賭歷任畏事不敢驅禁公至擇尤懲治賭風頓戢日與民講論忠孝節義環聽百十人有聞之注下者分州向無衙署一主一僕居天后宮階下棗行竈而食陋規分文不取廉俸不繼當質一空晏如也人以爲陸清獻再生云

讀杜工部集呈杜岑梅舅氏

思唐

萬古此乾坤珍奇無不有誰知造化心都落詩人手白也偶比肩退之尚低首我是杜陵甥許接辦香否

從叔母蔡孺人殉烈詩

孺人為耐齋從叔父淑儷粵寇之亂殉烈烏傷之鵝峯從弟調臣

鼎梅徵詩於余敬賦一首

應氏指莊氏齒千古貞媛罵賊死並見邑志罵賊死猶不死何如我家叔母氏

叔母生長舊儒門西山家風今尚存自從嫁作清河婦賢孝流傳偏人口

一朝毛賊擾東南大將鹿走孰奇男阿兄殺賊鞍子嶺

孺人兄拙齋舅氏倡義圍禦賊鞍子嶺被擒不屈而

死阿妹禦賊鵝峯頂殺賊賊應怕遇賊將賊罵白刃光中聲琅琅紅蘭拌
死一天霜吁嗟乎身匪石心如鐵為報郎君矢勁節直上彤廷乞帝褒梅
花嶺畔朔風高迄今傳已幽芳立不愧祖堂名貞則
貞則堂為杜門始祖御史
公奉節母樓太夫人之所 安
得他年詩再續待儂送入輜軒錄

讀南史張融傳

陸處無屋舟居無水權從岸上牽小舸臣無二王二王亦無臣書法何妨
持兩可不恨我不見古人所恨古人不見我嗚呼仲尼獨何人寄人籬下
無一妥王儉劉澄徒瑣瑣

九日與季弟湘秋振湘侍家大人游半片山寺

到此真奇絕人間路已非一峯穿水過雙鴈入雲飛寺僻看花晚僧慵見
客稀吾家詩禮在不必問傳衣

秋夜杜祠寄杜卓齋嘉粟鐵橋受謙

日落西亭後山中世界新露風狂似海秋月瘦於春鏡砌螢愁客窺發鼠

日落西亭後山中世界新谿風狂似海秋月瘦於春繞砌蛩愁客窺鐙鼠
笑人今宵吟興足况與浣花鄰

與黃雲襄先生

紹庭

夜泊柯橋懷蔡中郎

日暮雨淒淒扁舟繫柳隄鐙明知市近水長覺橋低曠代才難用滔天路
易迷何人猶弄笛聲在小亭西

過屏山寺

行行山萬疊景物亂如麻竹瘦因生筍松香為著花人情雲變幻世路石
敲斜窮通應有命不必問僧家

苧蘿村即景

谿西舊宅勝谿東天為佳人點綴工隔岸鐘聲流水碧橫江塔影夕陽紅
雲開始覺蠡巖近潮打休憐雉堞空分與他鄉風景好一帆煙雨五湖中
谿山一幅畫中描也學西施分外嬌步屨如留聲隱隱浣紗依舊水迢迢

青苔有迹花初落紅粉多情石未銷最愛漁舟江上過年年歲歲送春潮
偶向花間踏輦塵風光畢竟為誰春桃開西岸仍含笑柳近東家尚效顰
白鷺眠沙拳雪爪青鷗逐水感銀鱗扁舟一櫂村前過可是當年訪豔人

登八詠樓

梅花門外泊行舟來訪當年沈隱侯八詠文章山並峙六朝事業水空流
長橋虹影橫前渡寶婺星光接上頭試問儲君操選政人間賸得幾高樓

奉陸申甫方伯檄勘災荆谿並會籌宜荆工振得詩三十章選五首

奉檄息息出瀟湖湖在宜荆界吟成俚句不嫌麤漫言鄭俠非吾輩權作流民一

幅圖

陽羨無禾浪拍天我來尚踏蜀山煙今朝坡老如猶在應悔當時此買田

蜀山有東坡先生書堂

國山碑刻負高名無補荒年亦自驚輸與山腰粗礪石燒灰尚可活蒼生

岩戶多鑿石國
山燒灰營生

十萬人家斷米薪飢寒何以度冬春

無禾無菜無麥冬春飢寒
交迫流離槍劫不堪設想

不知來歲秋禾熟

幾個遺黎得食新

陸中甫方伯樊介軒學使讀
至此取筆批曰仁人之言

楊店茅園路尚遙生平未到況深宵無鐙無月無人問摸過前谿獨木橋

由楊店釣橋至長山日已暮
復夜行四里許至白茅園宿

奉檄勘放金壇溧陽宜興荆谿災振得詩三十章

選二首

曾記賢侯沈劍芙吾鄉築堦舊分符誰知此日繁昌里竟似當年大呂湖

沈公寶青居溧之繁昌里前宰吾暨曾修大
呂諸堦今公逝矣公族兆三先生有災請勘

沈廬入夢憶前年舊榻仍從閣上眠多謝梓潼賢太守房租不索一文錢

去歲籌振宜荆借寓文昌宮有更深忽作沈廬夢淚落荒山
亂石中之句按文昌為漢循吏文子禽參見曲園師梓潼傳

張視祥

字霞仙澧塘人廩貢生有詩稿微之不來茲從
傅氏梅嶺課子圖及斯氏節烈合編采入數首

題梅嶺課子圖

太白之山蜿蜒不絕衰而西為梅嶺參嵯屹嶮

名勝志太白在剡西七十里向東者為西白向西者為東白入暨為射白其下

衰而東者吾里居所依馬而梅嶺適當太白之西其脈則來自太白故及之

旁有傅氏讀書巖春至花開如積雪雪中高卧

箕尾之星精蔚為霖雨徧八紘頭白翻遭紅羊劫被天抑塞作諸生家藏

琳琅三萬軸自住柴桑耕且讀不喜愁康垢面游不學阮籍窮途哭曰予

有兒慕相如作賦十年擬子虛

賦多刻詩經精舍七八集

幼者嶄然見頭角能讀九邱八

索之奇書階前雛鶴雙舞秋樹根頭坐論古興來斗酒詩百篇藍田日

日風和雨有時西圃鋤晚菘有時北谿理釣筒首戴元真青箬笠歸來高

唱大江東

先生喜耕釣又善歌響過行雲

嗚呼此事如昨日賤子平生猶能述哲人其萎梁木

壞空使鯉庭常含恤近逢倪迂善寫真令君橋梓盡生春分明老屋藏雲

壑弈弈鬚眉更有神見者咸歎丁蘭孝丹青欲附千年貌當今孫譚盡詩

豪

彥清仲修兩先生

其餘亦思尺寸效金花箋玉局仙懸之錦屏人宛在先生見之

亦嫣然君不見信陵墳上犁為田三千珠履渺如煙富貴多無翰墨緣翰

墨足延年星使南來尋禹穴再采圖詩入輶軒

題斯氏兩世三節圖

牽機藥苦太無靈五夜霜風動素檣姊妹花開春已老望夫石小雨偏零
人間慣唱離鸞曲天外孤明婺女星君看上林多少樹一松低覆兩冬青
鳳詔九天旌節枯姬姜今已白頭顱誰知素幌三星祭同化青山片石孤
寡鵲歌成春夢短抱魚泣下水聲麤徐家匕首趙家璧肯換鄜商封地無

再題梅嶺課子圖

春田藝黍晚來歸獨抱遺經坐翠微似孤山風雪裏一雙雛鶴繞花飛
手攜冰雪避閒人遺橐茂陵藏等身天覺梅花寒到骨膝前賜與十分春
兀坐花庭思悄然雲歸太白月當天雙雛階下鞠躬立合授商書說命篇
儂家世業亦青緇庭訓蹉跎學半荒羨爾讀書梅樹下春山何處不聞香

許登瀛

字伯禾藍田人優貢生畢業法政學校京選法官浙江民政司科員有深林一枝軒詩草君天資穎秀博聞強記詩思清新惜年不永未能竟所學

不寐

漏靜夜悠悠殘燈照獨愁清風微動竹涼月淡窺樓客夢連天雨蟲聲滿地秋興闌剛欲睡一鼠攪牀頭

舟中偶成

夜雨江流漲扁舟一葉輕帆斜風得力浪軟榜無聲芳艸緣隄長青山隔岸迎蓬窗閒覓句頃刻到江城

雨後郊行

春鳩鳴處雨初晴薄暮芳郊適意行半畝池塘新水活一村桑柘晚烟橫青山對我真如笑綠野留人倍有情聽得扶犁歸叟說高田今日儘堪耕

曉起驚雪

夜來雨無聲只道紅日見早起快開窗山林白一片

七月十二日杜仙嶺遇雨

砢礪一聲雷千山勢欲摧陣雲吞樹盡驟雨逐人來

山齋印景

疊疊黑雲頭上生狂風捲雨似盆傾一蟬噪住西山雨又放斜陽半日晴

遊春詞

小語燈窗夜漏遙東家姊妹不勝嬌明朝相約踏青去十里春風度板橋
稱身衣服巧安排淡淡羅衫紅繡鞋曾識春風桃李面回頭一笑整金釵

贈友人

興來掃石坐深林綠樹亭亭罩午陰閒倚東風三弄笛松花如雨滿衣襟

夏初家居偶成六言二章

雨霽蛙聲喧鬧風來蛛網欹斜且熾小爐活火自烹一碗新茶
安樂窩中逸客逍遙館裏閒人竹裏蕭齋讀易小橋流水垂綸

孫誦洛

字案丞西城人諸生病无曰君美豐姿有穎悟家富於貲而好讀書靜默寡言尤遠於佛學年未六十而碎吾友余鐵珊輓之曰毗耶杜口無言說兜率前身有自來信然性喜吟咏在楊子

江舟中與吾及蔣宰堂周俊人咏小孤山君出奇語驚人茲從其子源浦求詩稿僅得一帙亟登數首可以知其概矣

和孔逖父先生海上相逢感贈

邂逅相逢正夕曛高談齒頰有餘芬
逃禪身世應嗤我艸檄才華孰似君
兩戒山河何暗淡九天花雨自繽紛
幾時得酬昇平願歸老家山卧白雲
四疊前韵逖父先生見酬

佛法曾傳觀落曛天花散後尚留芬
身原四大本無我緣自三生故遇君
細柳營中無枉縱妙蓮池上少煩紛
人間小謫同遊戲蒼狗儘教幻白雲
六疊前韵和逖父先生見酬

高才久羨曝秋曛杜老哀吟有異芬
大澤龍蛇羣起陸小窗風雨倍思君
客懷寂寞鄉愁湧國粹銷沈異說紛
問字今當從隗始一生低首拜楊雲
孔逖父周介堂兩先生招飲九疊前韵

置酒論才到日曛家醅斟後溢奇芬
目中湖海無餘子天下英雄有使君

尚友千秋首猶肯傾聽四座靜無紛相逢慰藉多愁語一吸長鯨氣薄雲



置酒論才到日曠家醅斟後溢奇芬目中湖海無餘子天下英雄有俊君



諸暨圖書館
— ZHUJI LIBRARY —

諸暨詩英續編卷五

邑人徐道政病无輯

男頌頹楚樵校

駱元邃

原名葆慶字筠孫楓橋人以優貢登鄉薦九上公車不第然名公卿多折節下之所交盡賢豪錢唐張子虞臨海葛逸仙黃巖王子常諸君每論文無不推重奉為東南標志爭聘為書院山長門下甚盛先生工駢文尤擅長詩詞對客揮豪有似宿構推出之過易不自愛惜稿多為人持去得之者如獲拱璧蓋其書法尤為絕人同里陳蓉曙太史歸田索先生遺稿不得乃囑其子時中蒐輯遠近收藏家抄錄成帙太史及陳子韶余鐵珊為之序詩詞各一卷名曰補梅花館遺稿付讐師印行

楓涇曉發

圓蛛晻林樾寒光乍熹微涼影侵孤枕夕露朝未晞
睠言源芳躅忽忽贈將離西風一回首但見煙靄霏
芙蕖生江水灼爍有殊輝采之不盈掬曷以慰調飢

陳莼齋先生課子圖

四首

有子萬事足詩禮趨門庭嶄然出頭角穎發在妙齡
陳君一幅畫課讀寓

深情上有雙鳴鶴下有千歲苓縹緗五百卷卷襲餘馨良時不再得努力事令名毋為長局促皓首嘆明經

灼灼桃李花敷榮長安道冠蓋揚微塵富貴應須早有客來自南文思艷

華藻上書金馬門叩額聞者惱琪樹遘天風裴哀惜鸞鳥出處各有時苑

枯命所造願共素心人修身以為寶

名川毓靈秀楓水何湯湯楊鐵王袁與二駱族千載有殊芳美人山農公繼亭公

今不見淪替愁梓桑鳴蜩在灌木但聽啁啾忙鳳凰有五色嚶嚶號歸昌

老鳳日以哺雛鳳日以翔前修曷其繼徙倚為君望

岷縣早發

竟夕不成寐泉聲聒人早起視月當門亟呼檢行李主人固欲留僮僕睡正美豈不懷宴安前程殊未已路指杳靄中人在蒼煙裏微露滴松梢碧空涼如洗疊嶂兼層巖萬屋魚鱗比行行山幾曲纔見棲鴉起

為呂小麓題乃祖桃源圖

為呂小麓題乃祖桃源圖

吾越名山天下無，孕奇毓秀東南區。仰視剡面尤鬱律，厥產琅玕珣琪珎。
呂生小麓年正少，溫潤氣質類璠璵。昨來問字載以酒，酒酣示我桃源圖。
是誰豪末工點綴，水木明瑟花扶疏。少長男女各位置，中一人兮鬢鬢鬚。
云為小麓父之父，行年五十當有餘。久歷星霜凋兩鬢，飽閱世事炯雙矐。
夷門吹臺中州蹟，出門攬轡遠踟躕。心長髮短不稱意，彈鋏三嘆歸來乎。
歸來烽火天涯滿，前有虎狼後猘獠。除卻仙源無可避，若論人世誰能居。
昔聞胡麻飯，劉阮綽約桃花雙麗姝。絕好風光去咫尺，焉用武陵人捕魚。
豈知寓言十八九，古來傳述多子虛。而况江河嘆日下，盜亦有道今不如。
青犢已入王官谷，黃巾不拜康成廬。荒山足繭叢箐黑，蹒跚幼弱同崎嶇。
從古吉人天所相，醜類旋被王師誅。銀河倒挽塵徧洗，深山大澤無萑苻。
官儀老眼復相見，嶮巖歷盡成坦途。六七十尚強健，門生故舊紛鳧趨。

始知蔗境老愈美乃覺松身寒不渝當時豈不命鸞手重以海鶴貌清臞
 桑田滄海三寓目但留此畫未篋肱回首人琴俱闕寂關心粉本空描摹
 雞犬桑麻猶曩日夜冠文物非前模獨將故宅懷庾信徒有殘星愁謝敷
 梅墅堆瓊石漱玉 小麓家居白宅墅地有名梅墅者有疊書巖即朱子與規叔講道處巖中鵝梅墅
 堆瓊四字又有漱玉泉一名文公泉路旁石壁刻石泉漱玉四字皆朱子手蹟
 我來躡屐展龍山隅眼中文獻淪亡盡惻惻愁對黃公鑪國家中興逾廿載
 闢門籟俊如唐虞文孫繼起在庠序風流頗致詞壇譽鵬程萬里首發軔
 振躍漸向青雲衢先靈九原意有屬自宜邁迹光門閭為我披圖陳祖德
 得毋展覽重款獻

題陳梅庭太湖泛舟圖 并序

光緒戊子余來主講韓陽不及瓜期而去先是邑中陳少梅學博從余遊載酒問字無虛日常袖其封君太湖泛舟圖屬題因圖中自題句云扁舟憐我獨回樞慰雙親蓋古詩人芑相之思藹然孝子語也時以人事錯雜思久不屬比將去擬踐夙諾而封君已奉舉魚之諱適太夫人棄養矣嗚呼樹欲靜而風不息子欲養而親不待倚裝作此不禁泫然

鶯脰湖邊青草泊估颿如織紛遠錯上有桅檣啞啞烏唬聲下有水中枯

魚來留索鳥欲唬魚留索先生聞之忽不樂不樂兮如何所思兮天一涯

魚來齧索烏欲唬魚齧索先生聞之忽不樂不樂兮如何所思兮天一涯
人生萬里破浪乘風不歸去壯志亦復空蹉跎吾聞太湖七十二峯頂白
雲能隔家山影先生注目倚晴窗看之與陟岵岵等昨者示我歸舟圖板
輿從此賦閒居一夕悲風動寥廓星慘澹光模糊吁嗟乎廢蓼補華兩
不得還君此圖長嘆息當年猶幸早歸來畢竟承歡多幾日

清源葉生行贈葉松圃

葉生葉生真奇絕口不能言耳亦塞行年三歲甫乳哺好花險如優曇滅
續命絲兼返魂符奄奄一息絕復蘇從此更生人間世冠而字之成丈夫
所惜混沌無可鑿曰又曰謀都弗作疾痛疴痒誰與愬鐘鼓笙簧不知樂
昨者踵門來相謁入座惜惜沈且嘿我與世故通寒暄口呿舌橋神恍忽
忽然起索行波箋落筆揮洒如雲煙舉指善用李諧短草書不讓張旭顛
青箱舊是儒家子鄴侯插架滿經史要知慧業本前生竟以廢疾成奇士

吾聞皋陶瘖為大理官惠疇亮采唐虞年又聞許丞重聽作廉吏亦復致
治無頗偏何況調羹鼎鼐王相公齟齬嬰疾與茲同天意或者牖其聰何
難振聵更發聾自古豪傑類坎軻有時今我非故我申舟奚必羨鄭昭坦
之不妨名蕭瘞葉生葉生君知否勸君且飲杯中酒有口多為是非門有
耳況為榮辱根如今天下事已不忍聞天下事又何足云不如不聽兼不
語如君默默全其真

沈懋卿鄭韻仙招飲唼邑明心寺同喻曉人王著史徐仲嘉

開門北望明心寺經年不到何倥偬沈鄭二子招我遊有如羈鳥出樊籠
深山來值六月時涼氣能逼吟肩聳我行不習二三里驕陽炙背心先恐
喻家老子能解事呼廐為策龍駒種追風一騎紅叱撥銀蹠亂踏羣山動
須臾僕夫言稅駕已見巒翠隱朱栢衆賓雜還與俱來半為儒術推賈董
杯盤狼藉腥羶葷間以疏筍資供奉山僧籠壁多佳句乞揮素筵補其空

高情逸譚頗恣橫吐屬超然出埃壚忽憶前年同作客舊遊幾人來接踵
伯勞東去燕西歸無復寄語慰珍重諸君有酒且勿辭偷閒略埽人事冗
古來離合如浮雲莫待梅花問秦隴

去年六月與司訓黃東軒張桐軒諸人在寺
內宴飲極歡今各散去舊遊唯曉人在座

題阮緝軒先生授命錄四首

大地無完土昆明盡劫灰黃巾誰下拜白雁幾時來馬革殘尸裹鴟聲夜
月哀章安古漢郡回首泣龍堆

不惜千金盡忘家事國讐男兒真作健與子孰同仇手擊黃虜血魂來朱
鳥愁道遙河上者猶自擁貔貅

耨鋤成勁卒借箸固蘭防肝膽秋空厲櫓槍夜有芒平陵懷故吏蒿里紀
哀章七尺昂藏體由來重國殤
駐馬斜陽外荒城戰血寒我來歌壯士何處弔陳安帝錫溫綸厚門容綽
楔寬台山高不極奇節共噴坑

先月樓贈郭心齋四律

金庭瑤姥近為鄰，卜宅欣當剡水濱。百尺樓高湖海氣，一門林立宰官身。

日者推算西法五星心齋家後起多貴格

座環圖史能醫俗，家有田園未算貧。明月三分花四照，板

輿長奉太夫人。

年年風雨住名山，只隔君家水一灣。作客來從王謝後，論文交在紀羣間。

心齋為予十年前主講剡山時從遊之士今其子仲衡復來受業

故人待訂金荃集，諸子都為玉筍班。好與阿郎同

信宿

時與軫兒同客月樓

不教良夜放舟還

諸君旂鼓競騷壇，曾共樓頭敘夙歡。

月樓舊約吟社

未獲齊盟執牛耳，卻來安邑費

豬肝桃源俗尚追前古

地名石碓山水明秀衣冠簡樸

桂府宮名署廣寒，一曲臨風歌水調。碧

天翹望莫雲端

聚巖疏簾拂玉鈞，憑臨闌檻瞰江流。遙天西上初三月，大地東來第一樓。

梓澤亭臺高鞏雉，梁園賓客盛枚鄒。會應拊搗詩文債，再續平原十日遊。

都門留別贈黃巖管惠農庫部

蒼茫人海欲何之，忽漫離亭酒一卮。
五角六張都失算，東勞西燕又分馳。
婀娜無室憐萇楚，宛轉抽心類卷菹。
太息春明門外路，氈毼空折柳如絲。
躍馬鳴珂事已非，空搜蠶篋典春衣。
投珠閨室終遭怒，執戟金門尚阻饑。
往日賓朋邈河漢，故山煙雨冷荆扉。
承平恥作歸田賦，枵腹觸清歌懷采薇。
渺渺光陰擲逝波，琴心劍膽各消磨。
千金不買長門賦，五噫空聞過闕歌。
圓泖秋風鱸味美，析津樹色馬頭多。
惜君舊侶晨星散，從此閒階暗薜蘿。
辛苦年年動越吟，薊門雲樹負登臨。
舊遊重續歡都渺，遠道相思夢易侵。
待我荆高勞擊筑，濟人鮑叔感分金。
出山猶有鷓鴣志，倘許棲枝借上林。

江甯懷古

龍盤虎踞舊京圻，暮色蒼蒼冷翠微。
六代江山王氣歇，五陵裘馬少年非。
已無夜月瓊枝曲，一任春風燕子飛。
獨立荒涼何處所，夕陽門巷認烏衣。

日落波平不上潮石頭城畔路迢迢斷鎗鏞簇尋營壘墜履遺簪拾板橋
秋草冷侵江總宅淒風吹咽伍胥蕭瑯邪幕府今何在
城西北有幕府山以晉王導得名 黃葉

青山感寂寥

祝浦江戴介春先生七秩壽七律四首

鴻雪模糊記往年曾隨講幄坐青氈遺規白鹿名山業斗酒黃鸝禊月天
暫許曲江稱小友久從書社締前緣客中遙奏南飛曲雲路能教擷笛穿

時客定陽蔡卿泉前輩始以先生自壽詩見示

不須棖觸感前遊幻景煙雲過眼收自喜驚才呼蛺蝶慣開文陣埽驂騑

金門射策無同輩先生於道光丁酉科拔萃朝考存者止一二人銅狄撐荒閱幾秋轉眼十年仍矍鑠茲

泉留待釣竿投水經注磻溪有茲泉

人情反覆笑狙公雪釋冰消片語中先生在諸邑久排難解紛一言重于莒地接珂鄉薰德化浦陽

與暨相接天將木鐸警頑聾一庭草帶環書綠五月榴花簇錦紅初度在今年五月多少

先生自壽詩見示

鶴觴稱弟子浣紗江上坐春風

先生在毓秀書院掌教

禮經大小久傳家桃李公門徧是花飽學舊窺周柱史著書新滿惠施車
添丁濟濟孫曾繞算亥綿綿歲月賒安得靈泉隨杖履

原詩有八載靈泉作寓公之句

元亭親載酒肴嘉

墨菊二律

和官孚廷政優大令原均

傲骨清名兩不妨一番甘苦自親嘗

本草菊有甘苦二種

歸來彭澤天方莫老去樊川

鬢未霜愁染芳心迷夜月羞隨凡卉艷春陽
廊泉飲罷三升水合共真僊住括蒼

冷煙疏雨一枝枝開徧幽香蝶不知澹友獨能交似漆白衣翻化素為緇
植根元圃深秋節却贈黃金莫夜時會待墨痕重著綬西風慎護歲寒姿
留別都中次吳澄夫均

逼人情緒苦相煎
穉穉難酬酒十千
五噫作歌愁過闕
八方多事恥歸田

高科應向劉黃愧捷足常推祖述先此去傳經期有用河汾子弟亦凌煙

將赴閩省主
講金石書院

留別一首贈蔣笠山吳澄夫

蔣公徑畔曾相訪季子吳中共好文久客長安應不易宏才大雅孰為羣
遲他張翰萼鱸憶愧我君苗筆硯焚聞說成均新造士臨時猶足張吾軍

嚴子陵釣臺

一竿煙雨笠蓑輕不釣紅鱗只釣名滿目江山嚴姓外更無餘地讓元英

釣台東為唐方干舊隱處自
號元英先生世人無知之者

賃春肯住梁鴻廡偕隱曾同冀缺耕不見吳門仙尉女滿山煙樹畫眉聲

子陵梅福女塔
山中畫眉最多

荻花深處餉純鱸無限桐江舊釣徒漁火兩三波上下夜涼剛照客星孤
三間老屋對斜曛旁有西臺謝羽墳帝座故人開府客青山從此兩平分

嘉禾舟中有懷故鄉諸子

在山水清流出山濁不獨源流別渭涇當日若從京雒去風塵何處注遺經

楊春生變和時注
周易尚書等書

一別名山二十秋石門猿鶴亦生愁少時相與同住會稽深山石門奇境突兀輒嘯詠其處伯鸞夫婦皆高

隱歲歲阻人作遠遊李我泉
同源

不見風流潘騎省故人詩興近何如舊時示我閒居賦深媿山園奉板輿

潘廉臣
文潯

亦有田園未算貧每從樂事羨天倫出門千里無銜卹始嘆蓼莪是鮮民

郭槐亭
錫純

當年鐵笛已消沉屋外梅花空滿林一脉淵源繼詩派寂寥千載有遺音

吳澄夫
志瀛

慘綠風光憶少年相逢滄海又桑田豐城劍氣終應在潦倒如今却可憐

樓敘卷
錫九

子山才調擅風流自屈年年坐綠油贏得西湖官閣上荷花桂子夢清秋

陳梅坡
禹九

趙寶綸

字檢齋何趙人諸生著有安康居詩鈔先生為余故人詩有興趣而少警練入選五絕足知其味矣

哭輓又園家兄

雁行忽失淚痕多手向靈牀幾撫摩我似子規啼有血聲聲行不得哥哥

一丈紅

庭前花影度新簾三月新紅寸寸添五尺欄杆遮不住剛留一半透花檐

讀袁子才先生集題後

曾記隨園號簡齋檢身不及字聲諧狂生也想傳名姓其奈性乖詩亦乖

香巧閣即粉紅月季花

蘭蕙有香無粉色牡丹雖艷欠精神何如此種紅香玉月月溫存對老人

蘭蕙有香無粉色牡丹雖艷欠精神何如此種紅香玉月月温存對老人

水仙

粉面檀心冰玉姿自甘澹泊不趨時須知清德成仙品只費人間水一卮

潘文震

字雨人潘家塢人諸生著有荆香館詩稿君為余故人詩筆灑脫無留滯茲登其詠物數首亦一嚮之嘗也

金盆牡丹

絕世仙人下絳霄臨風倚醉舞雲翹漢宮脂粉皆塵土金屋自應貯阿嬌

瑤臺綠萼

仙子曾傳萼綠華瓊花觀裏舊停車如何不赴西池宴祇在人間道士家

銀窟仙葩

天上仙姑舊姓麻廣寒宮裏是儂家秋來金粟香如海散作人間榜上花

何頌華

初名棟雲字蒙孫何越人諸生○蒙文精楷法六朝唐宋法帖靡不臨摹得者視如拱壁生平清操自勵始終一節尤為可風詩無專集哲嗣變侯世兄檢寄數首雖非經意之作然惓惓故人之情躍然紙上足想見其風姿矣

哭老友金祿甫

從來大善足迴天君是龍華會裏仙故土安懷諸老少

君在味故鄉捐資開
養老堂興辦小學

忍

看灑淚到靈前
何人致富續成書少伯長才世有無卅載春申拋未得夢魂歸繞倦還廬

浣東昔載望煙樓君亦有盧憇倦遊一樣善人遺澤遠簪纓累世繼風流

壽錫恭

字梅契墨城人原貢生宣統初元舉孝廉方正著有求志齋庸言十則養性錄暨詩文鈔各如
干卷按先生為學主敬律已甚嚴而待人接物至和藹人皆稱其誠篤寬厚余鐵珊長建德
聘先生主教育躬行實踐士林翕然嚴陵學界至
今猶盛道之詩亦直書所見勿事彫飾古體尤勝

擬陶淵明歸園田居

自少不諧俗素志在山林詎料櫻塵網冉冉直至今有如遠離客楚然思
足音莊叟雖寓言實先得我心敞廬依日暖故宅入雲深桃李賞春豔桑
榆得夏陰門無喧車馬身已解纓簪遣興仍攜酒消閒一撫琴老妻偕作
苦稚子伴清吟差幸遂初服完吾百鍊金

伯陽尚知足知足良不辱勢燄豈因人農桑還敦俗經綸付布帛事業歸

菽粟空谷閔爾音自珍如金玉操術非有他其道在無欲
世運縱無常人生貴自立儘教馬首東豈作牛衣泣東皋好種苗雨中荷
蓑笠力穡乃有秋盈盈餘玉粒取求本無多即此可資給空山風雨廬最
宜龍蛇蟄富貴非吾願百憂莫交集

擬文信國正氣歌

正氣何磅礴充塞天地間有木不嫌直有石不嫌頑人得浩然者足以任
鉅艱盤錯資利器節概壯關山自古高風著峻絕許躋攀中天皋陶法晚
周孔子筆史魚直如矢柳下甘三黜為廉叔度膽為顏斂之髮為羊孝穆
心為柳夷曠舌或為豫讓義吞炭身可漆或為于烈忠羽林不可得或為
陶侃覺習勤誓滅賊或為韓偓腕草麻不能逼是氣所彌綸責備在我身
精誠昭天日血氣冠羣倫執義豈容昧守道自有真衛國存壯志誓將掃
胡塵雖遭陽九阨敢辭挽回力任彼惡氛熾我欲披荆棘強弱相循環成

敗互消息莫謂國無人天眷在有德成旅亦中興遺臣宏輔翼况時尚可
為敢直抒胸臆漢家有法度四裔善修飭茫茫千古事民族競自立衆志
可成城休效新亭泣慷慨復悲歌聲情俱悽急寄語神明曾報國今可及
莫畏勢炎炎莫嗟危岌岌義烈動山河行見鴻勳集

民國元年十一月管理建德城區選舉即事賦詩

崢嶸新氣象觸景正堪誇鵲噪林皆韻

投票所在城隍廟有山林之勝

人來筆亦花
選民到者皆於名冊上簽一花

字掄才宏選舉敦俗話桑麻古治賢能重前途盼望賒

延攬東湖

府城隍廟在嚴州東湖

勝雲光洗眼來傲霜猶有菊望雪欲探梅邑屋人才

集民權努力培印今施憲政多士莫徘徊

秃筆

短髮蓬蓬垂暮年中書不中亦堪憐鋒殘有字難成秀伴久相須豈忍捐
老樹無花江夢幻伏禾起義頡書傳興來直欲淋漓寫異樣精神付米顛

題金益堂君肖像

往歲見君立馬圖，英姿颯爽雄萬夫。
建樹勳名豪傑士，國家有事効馳驅。
今披此圖忽改觀，不似當年氣赴桓。
深深靜坐徵涵養，菩薩低眉意度寬。
定慧雙修期大覺，止觀並守孕金丹。
在山出山無清濁，仙佛英雄一例看。

何炳耀

字笠山泉阪
人歲貢生

晚渡浙江

浙水悠悠去行人，渡向東烟凝紅樹。
重潮落海門空，萬戶開新月孤帆捲。
暮風西陵回首處，燈火滿城中。

春雨初晴

暫雨暫晴好賞遊，迎眸風景足清幽。
剩雲吐出荒村樹，嫩日烘溫碧澗流。
掃徑花英紅半地，捲簾山色綠盈樓。
回看歸路行人歇，兩岸炊痕界渡頭。

江頭夜望

天地空無際，燈光遠處樓。山迴隨野轉，潮湧倒江流。亂荻橫灘面，飛星落渡頭。一聲長嘯立，驚起睡沙鷗。

山村夜宿

離遠囂塵地，清幽別一方。小樓明月滿，深塢白雲藏。泉水流音爽，松濤吼夜狂。曉催山鳥喚，紅日射高岡。

秋江

大江流不去，秋色布虛空。蘆岸花迎白，楓林葉綴紅。波光涵落日，帆影送清風。夾水漁家住，炊烟一路通。

思古隱者有感

不作榮華想，甘心老逸民。名山窩碩士，秋水渺伊人。節操生前重，文章死後珍。茅廬風月古，隔絕世間塵。傍山瀕水地，幽趣足幽居。竹徑清風爽，松窗夜月虛。寫情題石壁，溷跡伴樵漁。何是傳家業，耕田與讀書。

徐陰崇

字眉峯浣東人諸生宦游江西佐縣幕著有浪吟州詩稿○病无日昔吾安硯浣東永壽寺與楊曉湖徐眉峯把酒論文嘗稱二人詩律之細茲求曉湖詩不可得得梅峯詩稿於余鐵珊同

年處讀其詩如見其人

觀影戲

場外洋洋龜茲樂場上高懸布一幅相將走入廣場中晝無天日夜無燭
軋軋聲從耳後來有如縑絲轉機軸放出帷燈作作芒射入布端光眩目
尺幅中具千里觀但見山重與水複無端樓閣起空中畫廊雕檻繚而曲
中有絕代一佳人憑欄俏立看花竹忽見翩翩少年過嫣然一笑容可掬
從此兩情脈脈深如蝶戀花蟻慕肉中間好事偏多磨強暴忽來華父督
倘非義士古押衙那得阿嬌貯金屋此是開場第一齣都願有情成眷屬
須臾爭來湖海豪刀藏魚腹鉛置筑探丸斫吏氣吐虹呼盧喝雉飲醪醪
有時滑稽如淳于有時詼諧似方朔此亦人間快心事如披龍門列傳讀
復有大將蒞戎行鏡吹遠來風生纛佩刀一揮槍如林萬馬奔騰鐵蹄蹴

或駕樓船波浪掀或乘飛車塵沙撲飛艇御風凌雲霄水雷跋浪撼海嶽
看到風雲變幻中散作餘霞便終局阿堵傳神妙至斯不數婆猴與郭禿
我聞影戲始漢京齊人少翁祕擅獨豈如西人工製器傳播文明通光學
神采活躍畫未工光怪陸離看不足分明寫出幻滄桑都說花團錦簇簇
空即是色色即空飄然一瞥渺難捉身世都作如是觀夢幻泡影有誰覺

庚申七月朔自豫章往金陵乘輪過鄱陽湖阻風三日

行盡江右往江左時當七月正流火鄱湖萬頃水茫茫輪舶狹小形如楫
汽笛嗚嗚向前行後繫巨繩曳六舸青天白日無片雲水光激濺波淡沱
無端怒觸封家姨狂飈薦地揚塵堞江豚一吹雪山來浪花開出萬千朵
後船載重前船輕船頭高矗如累卵怒濤奔來輪欲摧幾番欹側幾顛簸
長年三老面如灰估客商婦淚交墮自念生死總由天不種惡因無惡果
即教葬入魚腹中亦勝馬革將屍裹視險如夷聽所之正襟依然相危坐

但聞榜人大聲呼速解繫舟急轉舵鼓輪回旋入曲碇拋錨下碇稍貼妥
火繖當空炎如蒸汗漿迸出體赤裸舟小人衆聲嘈嘈悶坐三日腰肢躄
舉頭遙見五老峯似憐似惜似詔我世途何往非嶮巖名利從來是韁鎖
試看海水正羣飛急流不退徒遭禍我謝山靈聊解嘲丈夫志不在蓬顆
生今之世貴競爭冒險而行何不可哥崙布與溫斯敦當初何嘗不坎圻
環行大洋闢新洲兩人功績高峨峨我讀其書思其人力雖未逮志猶頗
自知此言大而夸山靈聞之但笑歌語罷不覺風波恬一輪飛渡似箭筈

生事

謀生計誠拙悔作讀書傭慣聽羹餘釜類趨飯後鐘硯田逢惡歲質庫佐
朝饗祇恐詩腸斷飢來嚼字供

不寐

終宵思睡味醒到曉烏啼夢斷莊生蝶聲驚祖逖鷄寒衾身轉側殘柝韻

清淒却好尋詩句吟成枕上題

汝東留別

烟靄蒼蒼汝水東綠楊城郭畫圖中
半山經術談新義千字文章說古風
自笑容情多戀戀那堪行色便匆匆
平生歷碌公家事飛去飛來塞上鴻
于役孝岡纔半年來時春雨去秋烟
鴻泥著印還留爪狂獄難清且息肩
手握爰書三尺法心盟師水一泓泉

師水在城西會龍岡從巖間流出

翥山馬首遙瞻處臨別

魂消最黯然

感懷時事四首

獨立蒼茫放眼看羣龍无首海潮寒
九州鑄鐵心知錯百孔醫瘡肉盡剜
說士縱橫桃梗語將軍跋扈蔓圖難
書生憂國終何補痛哭長沙策治安
億萬生靈陷炭塗淪胥危局有誰扶
雄藩河朔唐三鎮強敵中原晉五胡
鶴唳頻年驚草木鳴張遍地是萑苻
祗愁蚌鷸漁人利舉目山川風景殊

本來國脈是民膏何忍屠刀日日操墨吏懷金輸暮夜謀夫言利析秋豪
度支慣把謬臺築竊負時聞筦庫逃十室九空腹削盡祇餘哀雁苦鳴嗷
紛紛時局似蝸塘上下交爭舉國狂萬里山河成四戰千秋倫紀失三綱
甘陵南北如狷犬候尉功名盡爛羊長夜曼曼天欲墜未知何日睹重光
戊午挈眷至樂平繼室陳氏病歿時悼亡已三次矣悵然有作

香夢春婆十五年鸞膠折斷已三絃不堪漏屋連宵雨又哭窮途薄暮烟
老眼重揮枯血淚前生慣結短因緣傷心最是他鄉路羈緒遊魂兩惘然
無限離愁到枕中寒宵誰話兩心同淒風冷月相思樹遠水遙山獨轉蓬
樂府忍歌三婦豔優曇又夢一場空聲聲鳥語催歸去悔不聽君耳太充

電燈

燈光巧借電光傳彩徹街衢玉鏡圓蠟鳳飛空星點點燭龍銜照月娟娟
人間信有長明火世界真成不夜天樓閣參差遙射影金蛇閃閃走蜿蜒

電話

鈴聲忽報到朋簪彼此通情面壁深未及交頭先接耳無須把臂可談心
兩家遙作隔牆語一線隱傳空谷音不出戶庭堪訪友相思何用杖藜尋

舟中望廬山

潯陽江上倚孤蓬遙望匡廬氣鬱蔥解誦坡詩識真面不須身入此山中

大小孤山

誰把芙蓉劍一雙擘流分插壓驚瀧大孤蒼勁小孤秀半入湖心半入江

楊希範

字梓林高嶺下人諸生○生天資穎異從余遊者數年詩筆清新學小倉山
得其逸韻其後從學蔣觀雲先生通八五之術著看義野逸談等數種行世

西竺記遊

松濤九里走崔巍歷盡亂峯畫障開山色自然流水活分明世界近如來

頭天竺

雙峯夾澗響清泉曳屐穿過薜荔烟松竹蒼蒼沈古寺蔚藍已到二重天

中天竺

雲山複疊路翻窮一轉樓臺面面通
蓮界清涼真樂極風光不與世間同
上天竺

誰將一朶紫蓮花擲向西方迦葉家
蕩漾倒搖銀漢水四時襯得赤城霞
蓮花峯

瞳瞳曉日石扉開無數山花點綠苔
行出洞門回首望一雙蝴蝶逐人來
香林洞

秋風八月桂花開石色蒼然鎖碧苔
我亦三生途上客緣何不見故人來
三生石

幽踪嶺上獨徘徊亭立空空一徑苔
鎮日望仙仙不到白雲一片過山來
望仙亭

古石嶽奇一片橫仙家此處作基枰
月明間院風敲竹隱隱如聞落子聲

棋盤石

勝地由來名喜歡雲臺高倚紫霞端空明一鏡東南角收得西湖座上

歡喜臺

紫竹靈山高萬重昂頭上與白雲衝我行方入白雲裏誰料雲端更有峯

白雲峯

病中感物

雙瓣鳳仙花經風雨摧折扶正後開出第二次新葩盛意鮮明不

減於昔有感

色相空時覺路開無端狂飈又喧聒幸餘入土根株在不怕橫空風雨來
一點生機無斷絕者番新意賴栽培一花一葉三千界是菩提樹茁蔀蕾

陳性善 字敬之 湖都人以縣試第一入學 學業浙江武備學堂 歷任軍職 性精灑脫 喜吟詠 早年遊詩

陳性善

字敬之湖邨人以縣試第一入學畢業浙江武備學堂歷任軍職性情灑脫喜吟詠早卒遺詩三卷逸興清韻專學隨園然多戲作及率爾成篇者茲登其首尾完善者數首足其吟魂矣

贈斯夔磬烈

辛亥十月

風雪金陵道戎車徹夜旋故人來萬里

斯君自廣西回浙江

民國正元年南嶺蠻苗地

西湖錦繡天勸君留不得餘虜在幽燕

雨後晚眺

殘雲收欲盡天際碧無央溝水驕新雨山光寵夕陽心隨飛鳥遠步入落

花香不覺歸來晚清風滿袖涼

清明掃故妻吳氏墓

山花自開落歲歲有陽春安得邱中骨重為枕土人酒同往年奠土讓舊

時新緬想生前事愴然淚滿巾

弔田橫客

事敵無甯死豪哉五百人齊王洵得士漢帝不能臣欲立千秋節何論八

尺身高風今已杳海岸石鄰鄰



諸暨詩英續編卷六

邑人徐道政病无輯

男頌樵楚樵校

閨秀

孟

蘊

字子温夫概里人著柏樓吟二卷行世○蘊母章夢天降霓裳女子於庭而誕蘊室有異香長好讀書字同邑蔣文旭蔣洪武丙子鄉貢薦授河南道監察御史未娶以諫易儲事忤旨被誅樞返經孟氏門蘊號恻隨往持喪葬畢辭父母構柏為樓獨居其上以書史自娛卒年九十三歲至宣德間御史蔣玉華侍讀黃文瑩以其節行併詩詞疏請於朝敕坊旌貞女萬歷中劉公光復蒞暨申請立祠肖像孟子廟側以大寒日遣教官致祭山陰張元汴作貞女傳載明史

自題畫松

森森老幹倚晴空萬木參差誰與同自惜棟梁人已去謾垂綵筆寫遺容

與童姬夜話

樹底蛭蟾聒耳窗前蟋蟀齊鳴話緒無端攪斷明河天際雲橫

錢

潔

字瑜素海虞人雲南龍氏土司繼女同邑陳鐵肩繼室著有青螺稿○瑜素原稿未見第錄平江胡孝思選本所收鵬翼垂天獲觀片翎猶慊然焉

春曉

曉日初臨曉鏡開
曉窗半啓曉山來
雙雙乳燕銜花入
多半尋春去復回
贈蘭姑新妝

春色盈盈立畫樓
不脩宮樣已風流
况兼雙翠雲肩上
學得新梳燕尾頭

二絕筆意亮若鶯轉宛如珠
游非寢食才調集何以得此

徐昭華

字伊壁始甯徵君咸清女楓溪諸生駱如采室幼時受業毛西河之門著有花間集○西河徐都講詩序昭華才高下筆都利如道林秀樹使人彌望不能卻以方前人第不知與寶滔妻顏頰如何其他則負此多矣

擬蕭愨臨高臺

高臺高百尺
極目望難窮
吹笛青霄上
行歌紫霧中
窗飛巫峽雨
門聽景陽鐘
水蕩長江遠
霜寒石道空
雲流歌扇綠
花落舞衫紅
三時誰度輦
入百漢離宮

吳寶厓曰此詩較利於簡文而重於庾信不信六朝金粉尚在閨閣

陳其年曰昭華擬古傳骨發
艷彩無一處不似齊梁間人

擬盧詢中婦織流黃

關山道云阻天河水亦澌寒風暗入牖促織漸鳴幃征人懷故絮思婦理
殘絲難將長命縷織作斷腸辭

擬劉孝標妹贈夫詩二首

流蘇錦帳夜生寒愁看殘月上闌干漏聲應有盡雙淚何時乾
芙蓉花發滿池紅黛烟香散度簾櫳畫眉人去遠腸斷春風中

擬木蘭辭

七夕哭
父作

戚戚復戚戚天孫罷機織只道天邊歡會期不道人間別離日人間別離
真可憐天邊歡會知何年悽悽登我堂不聞烏鵲喧但聞老母痛哭聲連
連恹恹入我房不見瓜果陳但見蛛絲蟲網相向牽前年當此日天河正
瀾瀾分將五色縷聯作百年卮去年當此日天柱方傾頽桂陽城北乘羊

去緜氏山頭跨鶴歸况復今年當此日百歲堂前喪靈匹欲曬麻衣兩淚
懸但啓書樓寸腸磔天河有時挽天星有時轉惟有乘槎一去人萬古千
秋不復返穿鍼徒望眼不使淚眼親九華空照地不照下泉人黃姑此夕
依然度惟有嚴親不知處木蘭空自夜停機願代爺行竟無路戚戚復戚
戚作此七夕辭欲知此日心中苦視此河流無盡期

汪東川曰聲調
哀苦體致愴惻

舟泊垂虹橋重緜吳江閨秀詩有作

吳江之水春泱泱水邊曾蘸青螺香我尋黛影不得見對此綠波空斷腸
殘星點點障輕霧左妹金閨在何處雉堞連牆有蔽虧漁舟蕩槳空來去
菱花菰葉滿江浮畫燭銀缸徹夜遊曲渚流霞漾金線碧天清露灑瓊樓
一時吟咏出花下百尺天孫錦雲絳相隔風光知幾春教人宛轉懷長夜
十幅蒲帆五兩風長橋猶跨舊城東美人不在橋邊住盼作春天一段虹

毛西河曰淋漓宛轉極俯仰踟躕之致千古才人相惜處讀之生感

彩毫怨

榆落薊門秋
征人出塞遊
新鴻迴絕幕
孤月照空樓
拂紙千行淚
揮毫萬里愁
緘題猶未竟
重拆問封侯

詠離堂看梅花同雲衣作

春風一夜至
春色滿亭臺
雪送輕寒去
花迎淑景回
倚多疎片落
坐久暗香來
願作同心藥
分移鬢上開

送尼御符還吳

芙蓉曲岸散紅霞
送客江邊楊柳斜
蘭槳行時飛化雨
錦茵鋪處布金沙
乘杯欲渡吳閭水
拂塵曾開鑑曲花
一自水田相顧去
何年重把綠袈裟

格律高雅不止
風韻昵人也

同雲衣遊浴花臺有感

臺為外王父商太宰第
中之勝今為姜京兆宅

習家池上覆春雲此地曾經刺繡紋
近檻游魚浮碧水當階細草拂紅裙
風吹二月鶯聲度露滴千巖花氣薰
行到浴花臺畔路不禁雙淚落紛紛

新篁烟雨

翠竹臨池碧水寒輕烟散入玉闌干
不知昨夜黃梅雨卻道春深露未乾
月下贈商雲衣和韻

一彎初月出雲新照見花前滿面春
羨爾雙蛾似初月不須相待畫眉人

塞上曲

朔風吹雪滿刀環萬里從戎何日還
誰念沙場征戰苦將軍今又度陰山
長雲衰草雁行平沙磧征人向月明
思婦不知秋夜冷寒衣還未寄邊城
曠騎三千出漢關雕戈十萬卧燕山
月明近塞頻驅馬尚有將軍夜獵還

陳迦陵曰閩中人作雄詞調陞小說家女俠習氣獨
昭華塞上曲沈情超筆漢世樂章忘其爲唐山作也

送虞英嫂歸諸暨

落盡紅衣蓮子多相看綠水木蘭過曉風不解吹愁去偏送佳人到芋蘿

西湖竹枝詞

赤石磯邊湖就姑長將綠髮石邊梳妝成只怪西施巧那便花花似此湖

胡慎儀

字采齊山陰人楓溪諸生駱烜室著有石蘭集○劉豹君曰石蘭父世繹入藉大興官元城教諭送家於北石蘭同夫容嶺南夫死攜家累及五櫬北歸撫妹臥雲女思慧為女婿洪洞劉侍

御乘恬

宴滕王閣餞蔣太安人北上

一閣到而今重看玉佩臨詞章隨世變別意共江深宴罷簾都捲悲來酒
再斟難隨孝烏去孤鶩自浮沉

商寶意曰起得超忽頷

聯意境開闊儼然少陵

歸衰過庾嶺感作

五櫬十三人艱危仗此身經年淚洗面百感痛傷神江右無茅屋燕南有
老親如何千樹雪不似去時春

元城學舍省二親作

十笏廣文齋尊慈白首偕親容存滿月女骨勝枯
巖忽忽人真返深深玉已埋琴書都散盡莫檢嫁時釵

壽王太夫人

令族烏衣重爭傳孟母遷同為異鄉客得拜繡簾前
酒進春回曲人欽不老仙麻姑同獻祝玉樹更千年

諸作篇法既高句意復佳而其胸次直吞星宿海矣豈閨閣也哉

侍蔣太夫人滕王閣小宴

瓊筵遙對翠岑開環珮聲飄逐隊來潭影秋雲飛畫閣
山光野色浸霞杯移將蕢梗浮沈跡列向萱庭次第裁
應惜佳遊無好詠春風空遣謫仙才

王金英曰圓如轉環健如屈鐵李龍眠白描高手

客途新柳和妹玉亭原韻

金樓
魏魏舞態新顏黃初試正宜人參差霸岸含明露
卷中章臺眼早春

金縷毵毵舞態新
額黃初試正宜人
參差灞岸含朝露
掩映章臺報早春
青眼慵舒還是夢
脩眉未展畫難真
風流綽約誰能似
張緒當年已絕倫

寄懷蔣太史心餘五弟

如何疏散卧江皋
卻負詩中一世豪
沽酒每聞捐玉佩
濟人時復典宮袍
文星下界耽遊戲
娉姊天涯苦鬱陶
消受吾鄉巖叡美
玉堂風月未宜拋

偕女思慧及婿劉侍御

乘恬陶然亭躅青

萋萋芳草綠城隅
花外同牽御史車
勝跡登臨荒冢地
孤松突兀破窰墟
簪裾雅集庭闈共
鸞鳳和鳴宴飲餘
倘割菰蒲結茅舍
不嫌來作野人居

石蘭詩陶寫性靈蕭然自得節孝之氣時
溢流楮墨閒固不比尋常吟弄風月也

早起

一番花信五更風
那管春宵夢未終
起傍芳叢頻檢點
夜來曾否損深紅

夜眠

銀蟾朗徹有餘光
靜坐庭軒寄興長
地僻不知更漏永
瞥驚花影過東牆

右二詩見
隨園詩話

賦得弄花香滿衣

小苑紅深綠未肥
獨攀嬌蕊弄芳菲
雙粉拍穿花蝶何事隨
人上下飛

蔣心餘云采齊詩如光風蘭蕙舒卷自如
兼工為詩餘姿致楚楚在金荃蘭畹間

駱思慧 胡采齊養女洪洞
劉侍御秉恬室

秋山瀑布

劈破高峯最上頭
玉龍直下隱潭湫
橫空百尺銀河瀉
挂壁千尋素練浮
濺雪噴雲楓葉冷
穿厓度壑翠巒秋
誰來濯足飛泉裏
洗盡紅塵一泳游

戴玉萼 甬東人字綠華已
諸生余陰祖配

送外重之河北幕

一輪冰鑑滿
照見物華新
入幕君甯貴
持家我固貧
素絃揮寶瑟
清淚掩

羅巾去去還無恙前途有故人

何九娘

楓溪路
維尹室

寄遠

闌干閒倚日偏長別後相思苦斷腸願得化為松上鶴隨風容易到君旁

方氏

失名桐城方靈皋太史曾
孫女邑四都楊之烱配

菊花

甘苦從來祇自知移栽南國幾多時桂花香盡芙蓉老點綴秋光總賴伊

借題
寫照

趙氏

經堂園懷舊

物是人非已愴然那堪人物並非前碧桃遇劫全遭斫綠柳無辜亦被遷
梁燕重尋無舊壘沙鷗欲聚少清泉綠蕪一片憑誰弔惟有寒蟬咽暮烟

呂春餘 字漱香西塢人
監生呂學裴女

紫霞巖落成紀遊

福地春深古洞天紫霞白社已千年
幽岳花簇鶯啼樹小徑風清鶴避烟
四壁都為遊子賦名山不許俗人傳
我來此地無多願祝向慈雲盡化蓮

月下詠桂

金粟如來是化身露華飛白小山清
西風不作悲秋思獨領天香步月明

朱筠 朱家壩人孝廉
章瑞麟繼室

七夕

一年三百六十日天上祇當一日看
牛女何曾怨離別玉樓人自倚闌干

張玉汝

字又嘉五龍張未能女楓溪朱爾田室著有金竹山房詩鈔○又嘉聰慧天成年十一讀詩即有依依楊柳處芳草馬蹄生之句塾師驚奇十四五性喜涉獵專意聲韻遂以詩名每篇出人爭傳寫觀其讀書一首有云攬筆欲書仍無有所欲言與古同自恨不知才力薄翻恨古人多著作此豈尋常閨閣也哉年二十四始賦天桃未旬月索夫作悼亡詩果以其歲溘逝摘其佳句初雪云猶疑明月在已把碧雲遮較水情猶淡論詩韻更清和朱月波感懷云生已聰明少身猶疾病多影云先生號自本鳥有之子神傳勝白描卧雪云自笑十年宜布被曾將一夢

到梅花皆獨
寫性靈之作

讀黃介園先生見貽五古長言志感即以奉謝

車非馬不前馬以車乃載意車而文馬所向無窒礙雄文本厚意咳唾珠
玉堆先生盛獎借後學蒙化裁或誇韻語工或稱織錦美風雲與月露各
自成綺靡兼數古才人來詩有鮑妹賦
若謝女咏絮語心誠向往之人生貴自立求或有餘師
但愧時術蛾學未究經笥敢謂雕蟲易遽作千秋思惟將附驥心時策千
里志

擬陸劍南芳草曲

秋去春來燕相續美人獨愁銷片玉奄忽離家已半年捲簾又見芳草綠
可惜光陰客裏消草色繚繚路迢迢歸與歸與歸未得一時愁難濁酒澆
春風定綠江南岸身在他鄉那得看不知何處最芳菲柳姑祠外紅橋畔
湖頭錦繡幾成堆梨花桃蕊為誰開一鞭想策路千里欲行不行重徘徊

強將登樓除煩惱樓前總是青青草誰家夫婿覓封侯封侯何似還家好

夏雨

頃刻風濤起遙空浪接天溪雲深潑墨山瀑倒飛泉生水添三尺新涼逼
一肩輕羅衫子薄應返采蓮船

落花

小樓一夜雨霏霏料得芳春頓欲歸蝶尚憐香留宿霧燕猶對舞到斜暉
窗前有力乘風去月下無言逐浪飛堆砌亂紅何忍掃纏絲幾度任沾衣
一片芬芳點碧埃空教各自席莓苔鶯嫌此日啼曾緩人悔先時賞未開
霄漢旋升弄玉去綺樓竟墮綠珠來榮衰祗藉東皇主枉費當年屈宋才

春盡花隨盡其如自是花西江女子詩也若嘉者真有無窮之感矣

新春

幾處牆陰長綠苔遲遲日影正徘徊蘭芽乍吐韶光動柳眼初開淑氣催

殘雪已隨疏雨去
曉風猶帶舊寒來
鶯聲又起垂楊岸
不管紅樓夢未回
春日雜興

天氣新晴漾麗暉
陽和卻好試春衣
簾中陡覺香飄過
蜂抱花英戶外飛
蠶詞

一宵更漏幾添長
睡起課蠶夜未央
纔白東方鷓鴣喚
阿誰有夢到漁陽

美人夢已到漁陽
趣語也阿誰有夢到漁陽
兒女埋怨聲口更趣

吳品梅 流子里人浣西石起
渭室著有焚餘草

雨後浣溪晚渡

淺水蘆花森森波
半天黃照雨初過
舟師笑指前村景
秋到溪山畫意多

袁秋華 字鞠英適
澧浦吳某

白桃花

幾樹夭桃傍玉樓
脂痕洗盡粉痕留
何須露井霜華染
自有瑤池月影稠

統國淡妝原本色文君縞袂亦風流天台此去春猶冷洞口淒迷雪未收

許行素

板橋許光亮女適紹興黃干城幼從其母舅楊紫林讀即嗜韻學後入上海愛國女校研究科學不廢吟咏惜不永年詩稿散失

題上林斯氏兩世三節圖

我思節母兮在太白之東阜太白時三峯寒光盪漾碧芙蓉一峯遙插吳
天長雙峯環抱雲乳香阿姑有志阿婦嗣銜蓼茹蘖甘如飴卅年歷盡坎
坷劫滿庭青紫動春色婢子生長鬻野草三山可望不可到西來青鳥東
飛去願寄一語抒情素

趙君慧

陽湖趙烈文幼女歸楓橋陳詵工詩詞惜早卒

月夜

瓊樓人靜倚簾卷近高寒皎色盈庭宇清光護曲欄風聲來款款花影淡
珊珊千里姮娥共相看玉漏殘

漁翁

風雨滿蓑衣乾坤一釣幾幾是天開雁落新張武庫已矣同勞火水游絲浦

風雨滿蓑衣
乾坤一釣磯
遙天聞鴈落
新漲膩魚肥
疾網撈秋水
游絲補
破扉收筌還
鼓枻隨處總忘機

諸暨圖書館
ZHUJI LIBRARY

言
暨
言
與
卷
六

方
外

風
雨
雷
電
天
地
萬
物
皆
有
其
道
一
以
之
為
法
則
無
不
可
測
矣
此
書
之
意
在
於
此
也


諸暨圖書館
— ZHUJI LIBRARY —

方外

陳寡言

唐人○字太初從田良逸學道元和中住桐柏山○神仙通鑑太初隱居玉霄峯號曰華林天台科法有闕遺者拾而補之居常以琴酒為娛每吟咏未嘗加飾

山居

醉卧茅堂不閉關
覺來開眼見青山
松花落處宿猿在
麋鹿一羣林際還

仲

皎
宋人久住
東白山

東白山聞猿

放意在雲表飄然更自由
挂烟羣木冷啼月一山秋
裊裊清風裏淒淒碧澗頭
三聲融妙聽行客若為愁

遇雪看山

西白山處那堪帶雪看
四圍銀世界一色玉峯巒
夜色和天冷清暉放
月寒溪梅初二著意為渠看

東西二道場

勝境東西白高僧一二禪只知行道處不記在山年澗月平分照林花各
自妍披雲尋舊址猶在絳峯邊

東白山

無地卓錫生計難且空雙手到林間猥隨碧水瞻明月豎打白雲賒好山
巖石空邊依草舍藤蘿低處著松關年來老去知何許合向人間占斷閑

東白山

啼切孤猿曉更哀柴門半掩白雲來山童問我歸何晚昨夜梅花一半開

諸暨詩英續編卷七

邑人徐道政病无選

男頌頰楚樵校

宋

姚寬見前

菩薩蠻

斜陽山下明金碧畫樓返照融春色睡起揭簾旌玉人蟬鬢輕無言空
佇立花落東風急燕子引愁來眉愁那得開

生查子

郎如陌上塵妾似隄邊樹一作絮相見兩悠揚蹤跡無尋處酒面撲春風

淚眼零秋雨過了別離時還解相思否

令威西溪集已佚此兩闋託樓幼靜魏從宋元詞中鈔來特為補入

明

陳嘉績見前

西江月 重過 泌湖

三十年前此地畫船隨處追遊
馬嘶芳草柳絲柔多少風流載酒
今日重過香徑湖山總是離愁
故人寂寞但荒邱情到不堪回首

蝶戀花 惜春無酒寄 甥王維宰

能得幾時春又暮半捲珠簾鎮日飄
輕絮把酒欲尋春去路天涯芳草迷
烟樹 百尺游絲縈不住蝶懶鶯慵
總是傷春處無奈杜鵑啼更苦聲聲
道不如歸去

駱問禮見前

大江東去 贈顏 傳

丈夫斯世論勳猷肯讓唐虞人物獻賦
公車仍報罷漫說圖書四壁倪子

勳猷 桑生鐵 觀且 臥袁安 雪歌 擊金石 可無前哲英傑 知否 江渚芙蓉

鋤犁桑生鐵硯且卧袁安雪歌聲金石可無前哲英傑 知否江渚芙蓉
門牆桃李各得時方發龍劍光芒射斗牛能向暗中磨滅馬援才宏公孫
遇驟何怕生華髮此衷誰識滿庭芳草明月

前調 辰

蠟潤齒端平曳雙鳧一葉輕視謝家規製還周正溪橋雪晴階苔露清任
詩魔催促無泥滄論平生消能幾兩珍惜過瑤瓊

陳洪綬 見前

如夢令

瓢笠春行無幾望斷桃花流水徹夜雨潺潺到天明晴矣夢喜夢喜又是
花朝晴起

前調

疎了宿花寵柳閣了詩人酒友風月悲與壯江山竟是誰家所有病叟病

叟今日花朝知否

長相思

病起遲懶起遲蜂子排衙叫午鷄牀頭改舊詞
趙歸期辦歸期忽值精
神恍惚時歸期定復移

菩薩蠻

小姑居處朱樓起烏啼聲隱楊花裏香氣出羅衣能留蝴蝶飛
遠山青
可見繡領遮團扇小立看鴛鴦心憐浴故雙

一幅美人圖

更漏子

留別諸君

一重山一重水有甚別離情思開扇面展屏風丹青都是儂
杭州客并

州況吳越兩山相望草母發荳娘飛望儂還浙西

清

余 縉見前

如夢令

柳禿桑椎何似綠淺紅稀到處長隄車馬遲祇有江天雲樹凝睇凝睇小
雨楊花貼地

搗練子 雙調

雲澹澹月濛濛斜風輕露隔簾櫳夢入春山忘近遠依稀人在老人峯
新兒小浪天高斷橋烟雨只峯杪欲探漁村花滿屋閒看谿女泛蓮橈

江城子

辛酉春日
探禹穴

小舟溯影入清溪花滿隄竹滿籬誰家樓外簾捲夕陽西記得前春橋上
月殘雪在鳥空啼殘碑已斷古亭欹澗松低暮雲迷梅梁去後幾度燕
巢泥爆竹一聲千嶂裂歸棹緩數峯移

陳述先

阮郎歸

征夫意

草衰塞外正秋時
風寒牧馬嘶
孤城落日感雙眉
擡頭見雁飛
家信杳
客途迷
空營不肯移
鎧生蟻
蝨肉沾衣
看人執爨歸

馮夢祖

蘇幕遮

夜

月初昇更已
又星漢河橫
已過黃昏候
宿鳥喧棲愁不畫
蟬咽林梢悄
憾東方宿露
珠懸花影逗
滿地殘紅
誰惜佳人瘦
遠聽空山啼
夜狄筭來
只怕人年舊

更漏子

寄思

玉鑪茗金罍
酒偏向錦堂
高壽香噴薄
興闌珊
倦嘗亭院寒
紅顏勝青鸞
鏡照起
裾釵相映
人已老
物猶存
蟲吟直到昏

蔣爾璠

見前

阿那曲

香絲裊出晴中景
簾捲東風帶舊冷
鵲聲爭上小梅枝
驚破宜春含笑影

小秦王

李維
春遊

村西有女勝吳娃
載酒登臨憶浣紗
若不溪邊逢少伯
春風虛度賣薪家

其二

香徑無烟遠碧蘿
嵯峨半壁漾晴波
閒花野草猶堪憶
借與蘇臺懊惱歌

謁金門

秋夜

風淅瑟吹皺沙痕淺
碧明月蘆花秋一色
天空寒欲滴
已是蛩鳴淒切
何處砧聲催急
可奈良宵強半客
霜華愁裏白

臨江仙

鑑湖

浙水東周於越境
樓臺晴吐虹霓湖光
八百沼天低萬川通
溟渤一鎮鎖南維
欲問吞吳霸國事
早隨流水東西
禹王臺下走龍蛇
梅梁風雨夜

排決湧山溪

一斛珠

寒食

嬌鶯妮轉聲聲吹破東風剪柳痕
一線湘波展寂寞春寒夜雨梨花館
倚闌卻歎芳魂寒淚紅飛入殘英點
不茶不飯淒懷黯怎樣愁人怎把愁
來遣

千秋歲

桐江懷古

扛扶鼎力宿海騎鯨客鈎一曲絲千尺
麒麟臺上飲蜻蛚竿頭立鴻羽惜
漢家名節漁翁翼鷺點灘邊雪月濯江心
魄映帶水嶺霄石波迴赤帝
子浪逐王家賊天地窄放懷高卧脚跟直

朗吟一過擊缺唾壺按赤帝脚跟上五字並宜平聲然決不可改讀者第賞其辭句可也

秋波影

中秋

把盞賞秋波問嫦娥圓與缺何物共消磨
人人盡道嫦娥豔未知嬌豔嫦娥

娥果否近如何空有相思無限恨影中暮
休言偏愛少年浪執烟河較

娥果否近如何空有相思無限恨影中摹
休言偏愛少年浪執姻柯較
織女怎減會銀河當時若使分靈藥羿應不死廣寒共樂事常多詠罷霓
裳曲桂樹復盈科

邊朝京

見前

踏莎行

春晚
寄友

草長離亭楊垂驛路幾時不見遊蹤駐讀書聲裏是吾家莫言孤館無尋
處門掩殘花徑黏落絮忽忽恨殺春歸去荒畦剪韭待君來教人立盡
西窗雨

滿江紅

並頭
蓮

十里清香芙蓉放雨葩單柄凝眸望驕枝合蒂分紅接影國色臨流肩共
倚仙姿踏浪妝相競怪桃根姊妹渡江來情初定
晚照墮殘霞映夜月
澹秋風冷見朱臉丹腮鬪嬌爭勝水面同浮蘭葉舸波心並對菱花鏡喜

言豎言
卷十
鴛鴦飛到學雙栖常交頸

鍾鍊雅切烘染欲
活寫生能品也

趙式

明月斜

夜香消幽夢斷寒鷄聲動五更初半窗殘月梅花亂

定西番 秋閨

曾記昔時分袂傷遠別送長亭柳初青
一去不知消息黃花又滿庭羞
見天邊鴻雁字人人

生查子 秋夜

病起怯新秋入夜清無暑一榻對空庭
瑟瑟梧桐雨點滴不成眠斷續愁
千縷殘蠟隱還明饑鼠牀頭語

醉公子 燈

夜香燒壘砌風雨簾重開銀架小池圓花開藕上蓮短檠留影那吐豔青

夜香燒疊砌風雨簾重開銀架小池圓花開藕上蓮短檠留影那吐豔青
蟲沈迢遞剪聲中更深漏點紅

浣溪紗

春閨

春入蘼蕪綠漸醺鴛鴦倦繡掩重門東風料峭又黃昏半幅輕烟楊柳夢
一鉤斜月杏花魂為誰紅裏有啼痕

憶漢月

蟋蟀

只在牆根籬角轉轉聽來還錯暗風苦雨正黃昏彈起空牀絃索
夜涼何切切啼不斷夢魂頻覺想伊也為怕孤悽不許人兒睡著

少年遊

春草

入簾有影侵衣無跡雪盡又重生索句池邊遊春陌上釵墮不聞聲
明君塚畔王孫路一歲一清明醉月吟風夢愁煙雨萬里送人行

柳梢青

楊花

春去空嗟隋隄漢苑雪捲輕花似醉如狂欲眠還起影過窗紗
隨風千里無家遮不住山賒水賒無定郎蹤無憑妾夢同到天涯

鵲橋仙

別

陽關聲斷秦樓夢杳閒卻玉簫誰弄美人回首隔長亭只隱隱南山相送
鏡分月破釵敲鸞隻咫尺扁舟難共半篙流水一帆風怎載得十分愁
動

蝶戀花

春半

角枕輕寒春睡足短屐行吟野路生來熟海燕不知何處宿江頭細草年
年綠新釀山家炊正熟乞得三杯歸取南華讀小閣一燈人影獨杏花
疎雨鳴春屋

點絳脣

秋况

林葉蕭蕭金風入幕寒初動楚辭閒誦飲盡牀頭甌役利驅名自笑成

虛哄黃梁夢封侯何用落得漁竿弄

蘇幕遮

風

作鱗而扶鳥路花信頻催早把青春誤
噓拂才雄天付與記序滕王妙手
帆飛渡是聞時非覓處
驀地門開又滅燈兒去
只道君家蘋末住四顧
無蹤卻在蕭蕭樹

芳草渡

釣臺

春水動曉帆開秦望去富春來嚴灘
七里瀉風雷灘轉處烟雨上釣魚臺
人所欲君所辱一足且加帝腹
睨軒冕等塵埃秦漢後先生者幾人哉

行香子

病

鶯語緜緜蝶舞翩翩惹人愁春色
年年閒情不斷好事常慳只臉霞消眉
翠薄髻雲偏花開花落燈後燈前
悶厭厭終日垂簾支離瘦骨少起多
眠有甚人知若箇問阿誰憐

御街行

春燕

東風鼓社招同旅宛轉梳新羽海邊一葉到江南擔得許多風雨夕陽孤
閣梨花深院重覓前春主珠簾不捲應相許喜入空梁處落紅幾片在
蛛絲不見繡牀嬌女忽驚春老又悲人去相對喃喃語

念奴嬌

西子故里

苧蘿閒步正鶯柔花媚春生游屐不見浣紗溪上女但見溪頭片石豔舞
留風嬌歌卻月樂破夫差國吳中往事千秋此地重憶莫問興廢存亡
荒碑古廟風雨空邱麥剩水悠悠流不盡依舊青山落日少伯勳名西施
窈窕付與高樓笛岸旁楊柳依依想見眉色

十二時

約誤

晚妝殘闌干日暮閣外愁雲千里曾記得茶蘼春底接著書兒一紙明寫
歸期暗留密約拆罷孜孜喜到臨時望斷江樓千颿過盡依舊夕陽流水

因把書尋來重讀說得分明如許舟發端陽人逢重九筆墨曾無異枉
驚疑風竹看看又是臘裏 既如今關山風雪料沒歸來道理但想薄情
果然忘我未必真來矣悔將書擲地攜燈又還拾起

陳一新

小重山 閨情

倏忽光陰過一春桃源分別處是何人記盟山海兩情深最難擺天氣欲
黃昏 猶憶話言溫道旁花縱豔豈忘貧許多心事待君論蹣不過階上
綠苔痕

桃源憶故人 旅況

蟬聲似怨斜陽道錦樣家山飄緲覓箇雁寄三行草搦管偏忘了 別个
紛紛爭買棹折盡綠楊娜嬾且把吳綾橫掃畫幅村莊曉

張宸

鬪百花

小雨和風輕度瘦絲肥紅乍吐雙雙紫燕初乳兩兩黃鸝交語閒步花深
拾得好音無數覓著新詩幾句坐起成歡舞春倦剛剛卻聽銀鐺茶沸
解意童子攜來消忘世慮縱目書樓垂楊陌上桃花隄畔酒旗搖處

樓

春見前

一枝春

戴明經晴初辱
賜留別和章

仙骨珊珊想君身定是餐霞咽露藍橋相遇贈我瑤章佳句好風吹到撲
面上俗塵全去卻不信鐵石心腸也為梅花作賦扁舟五湖深處把無
鹽刻劃恐伊妬錯回青眼賞識顛狂柳絮拍波浮水喜暫得盟尋鷗鷺只
可惜他日相思暮雲春樹

剔銀燈

燈花

不受風雨磨滅也不逐芳菲時節燒比海棠焰爭榴蕊斬盡枝枝葉葉游

蜂浪蝶幾曾許翅交尾接
棹轉天涯兩楫笑動鏡中雙頰屋角蛛絲壁
間蟾子同報匆匆喜色瑤臺重疊問何似殷紅一捻

趙機見前

滿江紅

東郭感舊

老矣王孫但留得銀絲成把難忘卻少年裙屐迴廊曲榭初片桃花春尚
淺未絲楊柳風還怕步中庭手弄是何人有心者過城闕向村舍松蓋
屋苔覆瓦尋壁間舊句墨痕已寡但記鸚哥眠睡處不聞燕子商量話只
今宵清夢定難禁又來也

行香子

聽過殘春且閉間門斜風細雨打窗櫺老鴉塗慣孩氣猶存但竹為个梅
為女柳為人裴迪不來王維獨酌醒時還假醉時真毫鋒乍試爐火仍
溫看筆兒乾障兒濕盞兒親

壽錫輅

月當窗 紙窗

素箋皎潔帖著檣櫂白伴我永朝永夕喜遮風常映月 少女來不得婦
娥似隔絕二者雖然相識除聲色匿形迹

張之杰 見前

天仙子雙調

集唐句贈趙白魚先生

美酒一杯歌一曲 李頎 湖館蕭蕭無俗客 裴夷直 種松皆作老龍麟 王維 輪一隻

白居易 鶴一隻 吳融 周步池邊消永日 元稹 顏貌只如二三十 徐凝 年華漸覺髭

劉商 鬚白 皮休 人間豈不是神仙 皮休 紫毫筆 白居易 珊瑚席 顧况 滴露研朱點周易

高駢

壽

僑

見前○吳沅芷曰眉生詩餘清雅激越綽有玉田草窗風格其別友二閨擊筑高歌乃直摩墨迎陵抗手清容矣

百字令

咏竹夫人

此君高雅歎偏因人熟也甘雌伏不作溫存兒女態林下風姿非俗冷月

此君高雅歎偶因人熟也甘雌伏不作溫存兒女態林下風姿非俗冷月
窺頻疎星度早貪近肌生粟迴身入抱誰言竹不如肉我已嚼蠟橫陳
一絲不掛賸有便便腹那識茶烟輕颺處薦地閒情帳觸未忍投梭何妨
卻扇占斷平安福天花無著須知空色俱足

又題魏睡山舉
杯邀月圖

人天兩界只當頭明月是真忙者西逝東生無住歇斟酌嫦娥偏寡一曲
霓裳輕歌慢舞忙裏偷閒且書生福薄闌干無奈低亞遙想玉宇瓊樓
離宮別院徧覆鴛鴦瓦惟有木樨香處是小立翩翩都冶記得當年飛天
杯遠消受春無價何當彈指清光依舊來也

金縷曲

別友人駱東溪
落京北解南歸

君本傷心者奈春明十年浪迹端憂多暇酒債尋常行處有顧曲周郎瀟
灑腸斷了芙蓉裙袂散雪團雲無限恨况何戡已老秋娘嫁言及此淚盈

把 江湖滿地知音寡
莽紅塵無端嬉笑無端怒
罵留取英雄心胆在
照此漫漫長夜莫乞相
五陵裘馬富貴人生如
寄耳歎鵝雛腐鼠空相
嚇母久溷乃公也

失意留難住最無聊
一燈如豆黃昏微雨藥
店飛龍誰唱徹同是悲
秋情緒知夢裏關山何
處瞻望白雲親舍遠更
銷魂思婦樓頭絮游倦
矣自當去 故園不少
蘭臺聚儘安排揮毫對
客閉門索句聞道比肩
人似玉試把周南誦與
看繞膝成行兒女回首
天涯愁病客悵烏頭馬
角徒延佇無家別奈何
許

望海潮

湯溪冬夜被酒有懷都門王午喬及杭州蔡春疇袁黎谷吳漱巖詩子

孤城斗大嚴更柝
轉當頭冷月纖纖燈影
乍疎酒情方湧枯腸芒
角尤尖他事不須忒只
常山詞老解唱宮鹽一
去長安天南地北阻郵
籤 伊人宛在霜兼有
中郎逸胄才富千縑袁
叟劍奇吳郎斧快分途
各媚香奩

時

歲新吳雨黎谷好 商陸火類添把閒愁掃盡魂夢都甜待得他時捧袂看我俾

巖新娶而黎谷好
狎邪游故戲之

商陸火頻添把閒愁掃盡
魂夢都甜待得他時捧袂看我綽

吟髯

沁園春

賀湯溪友人祝秋
香爲長男授室

快雪晴初元冰泮未間關
牽兮羨控鸞仙子珊珊佩
戛乘龍佳婿叩叩囊
攜笑隱金釵顰含玉筋
俊煞梅花上粉題銷魂處
有嬌癡小妹扇底微窺
阿翁馬足東西慣
廡下梁鴻愧老妻歎飄零
書卷儘消長夜伶仃兒女
暗數歸期我亦風塵天涯禽
向秋水蒹葭早夢伊
今何願願孫枝繞膝百
歲雙栖

前調

題陳小霞寒
江釣雪圖

雪影翩翩梅花冷淡仙乎仙乎看妙莊嚴相寒侵指爪
白光明地香沁肌膚活潑天機中流宛在妄想從來一點無
移情處信如魚得水如魚跳魚將身偃仰冰壺任人笑謀
生拙更迂羨孤山道侶幾生修到吳江風味

此意非虛自署頭銜笠擔蓑袂臣本烟波一釣徒迴翔久願調羹溉釜莫負今吾

眉生詩餘美不勝收其摸魚兒數闋尤爲人傳誦實則摹寫猥褻最足壞人心術故舍彼取此

鄺滋德 見前

法駕導引

三珠樹三珠樹花作月華身曉日迴光龍尾動輕雷飛捲海門雲歸路百花春
喧蕭鼓喧蕭鼓無數彩雲過掃卻欃槍天閣淡玉盃清淺酌銀河
衣上落星多

羅敷媚

江天客思孤懷悄明月寒潮花壓輕艘挂住春風仗柳條
朱欄綺榭音塵杳桂蠹蘭銷獨自吹簫人在西冷第一橋

七娘子

柳風吹夢鴛眠醒
茱萸淚漬相思枕
春怨花忙花憐春
冷三分瘦蝶迷花影
屏風暮展滄洲迴
仙姝縹緲招烟艇
湘瑟敲寒緜
笙吹暝涼雲卧月愁千頃

連理枝

拜月珠翹穩鬪草香
蟬並走馬春山露
桃枝底碧雲齊整
管東風千萬莫飛花
料垂楊應肯畫閣冰
簫靜戲打鴛鴦醒
曲磔闌干彩鷄啼後
一池苔冷記前來
七夕雨過時浸出
雙星影

周惺然

見前著有雙紅豆館詞鈔四卷○先生詞學醇香江右陶冕香卓然爲近代名手其論云詞成於宋逮姜白石出始集大成一時吳夢窗周草窗諸老如瞶之新至明漸流於曠矣我朝朱竹垞厲樊榭兩先生昌明南宋詞學復歸於正萬紅友復著詞律斤斤於去上之辨尤獨出千古然急於速成考訂頗疏如敘中誠齋垂法於擇腔按作詞五要係楊守齋作回波詞係宮中謔詞非出自裴談宋紅杏浪淘沙詞宜加近字崇甯時美成等增演慢引曲近等詞非一調也識者嘆爲知言全稿美不勝收選登數首已足津逮後學矣

滿江紅

謁鄂王墳
敬用原韻

巍冢麒麟神旗颺
英風未歇指一抹
晚霞世界尚懷餘
烈夢斷黃龍空斗

酒魂歸皓鶴，淒明月撫金陀。慘黑碧絲凝，爭酸切。三字獄，今都雪千載。
恨誰能滅，恨燕雲唾手金甌，仍缺古栢。膠枝蛟蛻脊。臬署猶存，栢枝南向。荒陵暗霧，鷓

前調

自述

咄咄生平也。愛劍愛詩，愛畫行樂耳。妓堂載酒，毬場馳射，春夢狂邀花鳥。
使秋風誰勒，尊驢駕被叢鷗，冷笑某何為。栢栢者，溪山主雞豚社，漁樵
隊農桑話。記阿婆三五雪絲盈，把荆棘間憑。田水洗烟霞，福向天公借。嘆
淵明終古一英雄，歸來也。

湘月

秋柳即白石所云，念奴嬌隔指聲也。

蕭疏幾筆，是倩誰描出。白門秋意，剗地西風攪。客夢吹得離魂，如水瘦點。
鴉偎微絲，蟲挂淡掃眉兒翠。笛聲還戀夕陽魚艇沙市。何事輕遣蠻家。
江潭搖落，把闌干頻倚。張緒當年，怎忍俊，秃髮毵毵如此。荒渚零烟，空塔

碎月秋亦無多矣凌波餘影依依仍箇人字

南浦

春水用
美成韻

春漲潑蒲萄聽鶯啼黛色茫茫催曉風起縐鞞紋搖柔艣輕拂蘋花如掃
煙汀柳港羣鵝暖拍茴香小回首湔滌人已遠剩卻帶腰芳草離魂銷
黯江郎甚江干送別年年不了波暖一雙魚天涯遠沒箇錦書流到滄波
縹緲暮帆數盡人歸悄淨洗飛紅點點不管閒愁多少

沁園春

登招
寶山

鐵峽中分猶峙豺牙雄扼蛟門望鷺濤滾白天容兀兀蜃樓噓紫海氣魂
魂淺憤延涼孤筇撥悶也抵金鰲頂上行難為水算茲游奇絕足冠生平
茫茫何處蓬瀛便終古東流不暫停歎移居徐市全家溟渤吞聲杜老
大地風塵冥羽驚弦危帆駭浪巨颺狂蜚魚翠腥干戈恨問誰能赤手縛
取長鯨

大江東去

軼張忠武國
梁用坡叶

蛇矛飛將盡橐鞬錦領推埋英物藤峽首勦妖鳥靜重整舊時塢壁鱗劃

刀癢血凝甲鏞髻短纒成雪

公頭早白
遍身癢痕

開平舊里丹青重畫人傑

公生常開平故
址無錫西門外

堪歎保障江南軍中驚破膽神威先發馬革未寒嗟一霎錦片江山灰滅

鮫匣風淒虎營雨泣空覓常山髮

忠骸我尋不得或云
在常州城外河內

忠魂安在劍芒寒逼秋

月

鵲橋仙

守朔平
感作

浣紗溪曲枉拋釣線偏到雁門關外甚時重得禮雲山渾不解烏紗滋味

城荒如斗庭閒若刹終日打盹而已秋風稍肯放人間便買箇蹇驢歸

耳

前調

笳悲絕塞狐噪破壁落葉舞燈如豆野狼夜半學人啼更怕聽鬼車聲吼

口外多
九頭鳥

居難容膝食難下
箸酒價十千一斗黃榆白草飽
邊愁枉喚做風流

太守

陳 愷

祝英臺近

芋蘿
尋春

浣紗溪尋韻事力怯行偏誤
獨訪三家也有關情處
可憐石上青苔江邊
碧草卻當得春風一度
王軒句感動香魂
呆把鞋痕覷那堪怪鳥呼人
野花媚客又踏破一條冰路

駱元遼

見前

貂裘換酒

陶然亭銷夏
贈李子萬

繫馬垂楊裏
忒匆匆鞭絲帽影舊游堪
記載酒子雲亭畔路
髮鬢衿痕猶膩
辛亥五月從南皮
張師同游于此
只眼底相思千里
欲采餘芳秋波隔望
青蘆蕭颯空無際
漸做就嫩涼意
居庸一抹遙橫翠
對蒼茫薊門煙樹
莫天新霽典罷鷓

裘黃金盡落魄誰憐蘇季但擊筑狂歌而已易水衣冠人何處聽渡頭日落悲風起流不去古今淚

清平樂

楚曉消夏送周
泰鄉南旋四首

吳頭楚尾極目人千里塞外征鴻歸也未腸斷尺書難寄怕隨王祭登樓祇成宋玉悲秋悔不當年聽取腦公一曲箜篌迷陽卻曲曷以傷吾足欲去不行空手于安得雙飛黃鵠依依咫尺離梭迢迢萬里君門亦有美人香草未須泣怨靈均豪情孤縱八九吞雲夢褒鄂凌煙毛髮動才識儒冠無用潢池盜弄戈兵漢庭會請長纓昔日軍前草檄黑頭強半公卿

八歸

秋夜聽雨
同葛逸仙

貌鑪香燼獸環門閉人在茜窗燈畔吳娘不住瀟瀟曲贏得無言脈脈柔情悽斷悔植庭前紅豆樹恁一片秋心撩亂那時節猶自難聽寂寞況孤

館 正值碁殘客去酒闌人散夢覺梧桐庭院一聲唳蟀一聲唳鶴更雜
一聲疎雁怕關山萬里刀尺聲中有人怨試回憶杜陵茆屋遮莫蕭蕭空
階堆葉滿

金縷曲

秋燈課詩圖爲
王敦夫題二首

畫閣秋如許想深宵牽裾問字一燈紅吐五色蜀牋親手擘已蝕羽陵仙
蠹歎零落舊時綠素柳絮因風才不讓算哀哀都作儀蒿句乍展卷淚淋
雨 蘭馨華潔詩空補最傷心庭前月落唳烏繞樹喚醒天涯游子夢衣
綫分明如故只勝了斷機殘杼博得蟠花雙鳳誥儘相償未抵丸熊苦矧
蝸角復遲誤

六代烏衣第悔十年登堂未拜孀星光翳隔幔文宣曾授業無數芝蘭盈
砌溯舊學青箱能繼蟬簡焚餘今不減望九原風木猶堪慰寶遺冊庶無
墜 小人有母門閤倚自昔時三遷成教龍鍾老矣寸草春暉酬未了朝

夕誰共雙鯉更莫問潘輿菜襪月冷銀沙親畫荻試回頭破銼寒燈裏大
行遠白雲起

石州慢

運河舟中依張
堃父均同逸仙

席帽歸來雙鬢飄蕭秋已將暮幾經水宿風餐夢落板橋漁浦莼稻蟹
不應賀監湖邊眼前負了登高處灑淚向西風問黃花無語 延佇離亭
多少垂楊勝一絲絲柔縷便寄征衣近日帶圍何據錦鱗卅六無端消息
平安浮沈都被庾郵誤倚櫂望江南隔蕭蕭疎雨

附逸仙和均

疏葦寒波衰柳長堤雅點催莫扁舟半展蒲帆行偏蟹汀魚浦燕
雲回望忽忽過了重陽客心漸入秋深處誰與共淒愁只黃花堪
語 凝佇閒來檢點征衣綻盡黃金絲縷便有魚書還怕平安無
據數行歸雁相隨早到江南遲留真悔當時誤短夢已難憑更篷

窻涼雨

念奴嬌

津門書感

河山兩戒對丁沽，七二茫茫寒淥。昔日花門誰玩敵，時有沙場遺鏃橫海。樓船極天秋水，到此中流束嚴關鎖。鑰魚鹽租稅猶足。曾憶碣石前朝淪胥鼎沸，但見滄波浴估客。颿檣遙隔樹，何處還連爐舳圖閣。衛青和戎魏絳自古分榮辱，壯心耿耿劍光空。繡落綠

滿江紅

津門望日同逸仙

一角蕪城帶淒煙，鎖住歸船。怎不見洞庭葉脫，催送寒潮。湓浦誰憐商婦，曲江南空憶玉人。簫恰卷，簾殘月挂，纖纖楊柳梢。雲低幕天，泐膠霜圍屋人。宋寥對蒼茫，官渡隔斷虹腰。九日黃花何處，戍一燈紅。豆可憐，宵想小窗淡淡聽，唬雅魂也銷。

水調歌頭

津門夜月兼懷吳激夫

林外一蟾瘦寂歷
炤烏篷蒹葭夜半霜
落流水繞孤峯
城上數聲畫角波
上數聲漁叢鷗夢
忒匆匆相思渺何許
腸斷荻花風
遙望處共千里月
明中故人應有招
隱書信寄秋鴻
屈指賀蘭山畔
回首燕支塞外
自古幾英雄
間愁復誰管
飛棹下江東

臨江仙

和子常均

極浦相思千里遠
美人空怨清湘
碧荷搖落任銀塘
鴛鴦三十六多在水
雲鄉飄泊東風楊柳絮
春來一霎輕狂
情根鑿却付洪荒
鬢絲禪榻畔清夢足悠長

浣谿紗

贈唐雲卿

桃葉桃根姊妹行
木蘭打槳下吳艘
合歡團扇又王郎
一曲瑤琴求彩鳳
三生銀牒譜紅央
春來秋去總成雙
腸斷吳孃一曲時
天涯遊子暮何之
春風多事管相思
得得馬蹄塵未

了匆匆鴻爪印誰知空勞紅袖拂題詩

百字令

祝斯松亭
六十壽

蒼松翠柏任秦火漢燹依然濃綠滄海桑田經幾見塵世已如棋局鬢髮
飄蕭精神矍鑠一副銅筋骨龍吟虎嘯長歌豪氣猶鬱今日解蒼蘇堤
腰間抽篋合奏南飛曲已拓辛家紅玉印六十奇齡新續洗筆題詩釀膠
介壽重遣湖心淥鴻妻雁序百年永享清福

清平樂

山行

羊腸曲曲夾道松杉竹贏得滿身都是綠來與瑤雲相逐後山忽遇前

山淺灣又值深灣歷盡山灣多少斜陽明滅林間

野花誰主開得紅如許得得意行無舊路

五字用劉夢得
蠻子歌中句

只向叢芳深處卧

遊權命肩輿津迷遙問樵夫自是看山興好茫茫不厭長途

清平樂

壽陳純齋封翁
八十六首選四

是香山老又是商山皓杖國杖鄉都過了穩受彤庭芝誥 當年年屆古

稀馬前曾祝張儀今日紫裘吹邃鶴觴重奏南飛

鄭虔三絕坐守青氈業矮屋能容高品格官冷心腸偏熱 本來哲匠宗

工允推菩薩儒童多少寒桃苦李年年噓拂春風 矮屋能容高品格冷官偏具熱心腸二語係先生門下士所贈

幽芳待闡矧復經離亂合把金銀斑竹管一例文章同纂 當時承乏角

東表揚勁節孤忠勝似吾鄉老鐵抱慚嶽嶺青楓 歸來造福珂

津梁來學後覺資先覺茗雲鴛湖同秉鐸泮冰羣歌思樂

鄉濟人寶筏慈航遙望長虹亘地斷橋化作康莊 楓橋五顯橋將圯先生勸募重修

減字木蘭花 贈錢唐王子壽茂才二首

吹笙緱嶺此是神仙王子晉騎鶴翩翩想與芝田舊有緣 西冷春好記

否鄉親蘇小小路不差多我亦移家近苧蘿

風流儒雅庾幕綠油來共坐墨妙淵雲篆刻兼工玉筍文 浮萍蹤跡撲

被無端長作客又近殘年孤獨單衾亦可憐

被無端長作客又近殘年孤燭單衾亦可憐

情久長

留別京
邸舊友

青袍如草無端又惹紅塵影憶昔日朋馱盍處裙屐相並算無多離合才
一霎付與駒過鴻印空記得冶遊花市轟飲香街都不似舊時興 敝矣
貂裘用了黃金盡儘相讓紛紛餘子蘭台薇省秋風一起待商略故國尊
絲鱸鯁苦說是飄零鍛羽西燕東勞此去也渾難定

望江南寄小韻

江南好最憶是杭州白傅堤邊行樂地紫陽山上讀書樓與子幾綢繆
記當日問字子雲亭落落江千車馬客熒熒天上斗牛分小謫聚文星
書齊靜花月愜幽懷蓬島五雲春若海平原十日酒如淮談笑雜談諧
朔望日染翰百篇多倒吸墨池枯水石橫衝筆陣走蛟蛇英氣不消磨
春山月湖上畫圖描芳草夕陽蘇小墓綠楊疎雨段家橋人倚木蘭橈

消炎夏嶺上萬株松繡鏤寒沙唐故壘銅駝廢礫宋行宮颯颯起涼風
涼秋夜傑閣倚雕闌桂子月明靈鷲路蘆花潮近鳳皇山高處不勝寒
殘臘近歸計理行裝百里湖山依越國一帆風雪渡錢唐身世付浮航

如夢令 送朱羊潛
往遼東

杜宇一聲秋曉愁煞玉關人老萬里寄相思寄得相思多少去了去了匹

馬亂山殘照

陳夔 字子韶號伯孤店口人諸生○君為余畏友其為學冥心希古詩文潔淨精微迥異恆流會稽
馬一浮先生謂其詞勝於詩遂專一致力於詞著有慮尊詞百闕其門人陳錫楨等為之錄刊

點絳脣 壬子

花滿春城袷衣初試清明雨鬧紅深處笑指湖邊路 隔岸樓臺似約游
人去公無渡夕陽煙樹又是春將暮

浣溪沙

春老殘紅慘不肥一雙胡蝶故飛飛憐他猶自竊香歸 琴曲參差愁玉

軫簾波蕩颺見金泥無端感損遠山眉

清平樂

碧梧修竹怎比人如玉學得西方新結束卻厭尋常羅縠別來過了殘
春閨中愁損芳魂莫向臨卣沾酒楊花最惹閒人

長亭怨

看隄上春回芳樹染柳薰花豔辰百五夜奏通明願乞青帝永為主幾番
風雨卻不道春將去切莫送春歸且共約薔薇留住最苦這春光漸老
依舊落紅無數頽垣斷井聽雙燕會人言語道幾度屬付東君怎不管飄
零飛絮待化作浮萍只怨春陰遲暮

太常引

癸丑

西風依舊遶庭梧門掩一燈孤依約夢回初可曾有還鄉夢無鏡中顏
鬢客中情味心眼兩蕭疏愁裏起行沾忍重過黃公舊壚

太常引

娟娟涼月又侵門街鼓已黃昏鸞鏡記曾分且認取當年淚痕眼前門
戶膝前兒女身後事紛紛誰倩夜臺聞可能慰今宵醉魂

躑躅

甲寅悼黃翰臣妹倩佐治天
台卒於歸舟旅櫬尚滯野寺

問客何能唱公無渡天涯祇有依人苦繁霜一夜碎春紅劉家小妹傷心
句古寺鐘聲危巢鳥語旅魂千載何曾寤桃花無意賺劉郎茫茫烟水
迷歸路

八歸

重五送張味真歸剡

梨雲夢冷梅風香潤春盡客子愁獨丁丁伐木思求友難得俊詞清韻和
歌相屬不道琴尊容易散只料理歸帆何促且趁這角黍蒲觴帳飲泛醺
醪曾記湖船共載水仙祠下不雜尋常絲竹晚山青送夕陽紅斂水入
垂虹凝綠正移情不遠此別何年載賡續憑魂夢剡溪飛渡更上金庭隨

君聽一曲

國香慢

鄭平甫繪秋蘭見贈賦此答之

一縷騷魂正含豪渺邈寫出秋痕猗猗晚香風汜入室濃薰歲晚嚴霜蕉
萃肯隨他桃李爭春中襟滿芳意自惜孤標休要當門 國香宜紉佩悵
靈脩數化甯僅荃蓀美人遲暮應念芳艸王孫一任空山獨秀問曲中哀
怨誰論勤培滄溪土為祝東皇莫使離根

虞美人

湖上
錢春

人生斷合花前醉不管朱顏改花枝莫笑少年心已是星星雙鬢不勝簪
湖邊春色歸何處寂寞春無語惜春常是替花愁祇恐飛花如雪逐東
流

清平樂

夏日山
居三首

小園西角斜日遲遲落照眼榴花紅一萼不負故山歸約 晝長午夢初

回沉沉簾幙低垂開着窗櫺一扇待他雙燕歸來
熟梅天氣雨過添濃翠芳樹斜陽明晚霽知否來朝晴未
小窗疎篔簹
平一鉤新月初生忽地遙天雲起濛濛殘雨籠晴
晚來新浴困便欹湘竹到耳鳴蟬聲斷續疑是薰弦琴曲
牆頭時見流
螢錯疑河漢移星坐久玉繩低轉夜涼應到銀屏

少年游

買舟西渡
晚泊江口

離離霜樹暮煙昏日夕掩柴門幾點歸鴉兩行征雁黃葉渡頭村
生來
只是耽鄉縣出岫懶於雲不分中年愁風愁水慣作異鄉人

疏影

夏丐尊以小某花屋圖索題且謂系念
故鄉容當重繪燈機老屋圖故并及之

江東賦客挈一肩小住虛室生白為有寒梅枝上么禽吟窗解伴岑寂玉
尊緩飲春風影悄不管高城橫笛且看他翦雪揉春費盡斷腸詞筆
猶
念家山老屋異鄉雖自好羈思如織怎不歸來紅萼年年次第無言狼籍

機聲燈影萱庭夢怕問訊綺窗消息要待他照影團樂認取舊時月色

石州慢

題李息霜前塵影事卷子息霜舊識朱李兩校書書畫便面各一幀及將被薙乃贈其友夏丐尊丐尊爲微題詠拈此調答之

弄墨然脂豪素寄情無限親切天涯訴與離愁欲縮同心雙結十年夢覺
笑桃巷陌惜惜春風猶記當時靨珍重惜花心付隨身吟篋明徹色空
無礙分解塵根水波雙絕莫怨恩疎能耐幾多炎熱螻蟻舊契倘教綺語
刪除拈花便是當頭喝泥絮喻禪心兩相忘風月

摸魚兒

題子淵臨湖閣圖園繪倚巖一閣江上兩小舟而已

倚危巖數椽高築風波眼底如許人間無限風波惡失足恨成千古憑記
取要戰戰兢兢常凜詩人句忘懷小住算恰好躬耕微吟梁父高卧待三
顧臨眺處幾葉風帆掀舞都緣名利輕誤請君試聽篁篔怨祇是勸公
無渡何太苦看比似錢塘八月濤猶怒南來北去要丁屬長年衣衲豫戒
莫到江心補

龍山會

夢蝶鄧尉探梅歸為述游興并出示九日錫山登高用夢窗韻唱酬之作寒夜不寐凄然有感即用其韻

朔吹侵簾罅旅緒淒清隻影孤燈亞寒威欺薄袂人未寢慘澹銀蟾西下
流水換年華歎客裏消磨豔冶試重尋衣襟點點淚痕如灑看他結隊
翩翩踏雪衝寒意氣雄裘馬故園花信早相思夢幾怨綺窗遙夜因甚不
歸來葭館動南枝春瀉有檐前舊時月色黃昏低挂

鵲橋仙

向夢蝶乞瞻園詞

魚懸珮冷豸冠茸淺回首長安日遠美人香草總思君誰解識湘纍哀怨
登高能賦歸田有詠道是騷壇冠冕玉田嗣響未消沉願乞取白雲詞

卷

南鄉子

城上月如鉤城下寒泉漑漑流蘋未清商風乍起新秋客子衣單動暮愁
歸路幾回頭風景依稀憶舊游昔日可憐歌舞地凝眸人語疏燈賣酒

樓

湘月

已未仲春之初與同人游水仙閣宋張功甫玉照堂故址也旋舍為寺今仍禪者居之而割其半以駐軍樂隊歸而賦此功甫娘久病起有入道之志又堂前有鴛鴦梅有牡丹名瑞露俱見南湖詩餘今猶存古梅數十本

碑碣凡六序舍宅為寺甚詳

南湖在望怕春寒猶滯輕負名勝有約條風似喚我攜展開來消領水竹
三分雲山一角檢校檀欒徑摩挲碑石忽聽隔院清磬因念舊侶驂鸞
雙棲自怯喜禪關清靜願作鴛鴦讓玉砌嘉樹年年交頸瑞露翻紅玉龍
噴碧應記靛煙冷梅梢月上戍樓畫角催暝

生查子

齊前十姊妹花一株楚楚可憐一夜大風為籬落所壓詩以悼之曰似虎風狂一夜誰庭前吹倒竹籬笆繁紅已逐殘春盡可惜同根姊妹花或者見之以謂有所風刺及園丁扶起竹籬花容依然復詞以慰之然恐被口語祕不敢示人也

小草弄天斜顏色娟娟好可惜託根微一夜隨風倒
扶起竹籬笆依舊
盈盈笑珍重好時光莫遣秋風早

玉漏遲

憂生念亂百端交集夜不成寐賦示羣從

晚來人意倦斜陽紫陌曲闌憑徧未定烏棲早又砌蛩啼怨一片蒼涼暮
景盡收入愁人心眼愁怎遣祇應說與杏梁雙燕閒雲不是無心奈鉅
釘陰晴霎時千變障面清游襟上污塵誰浣太息靈脩數化怕階下荃蓀
難免清漏轉生生夢雲驚散

西子妝

沈溪懷古

山送遙青門橫皺碧猶認館娃眉嫵至今春殿鷓鴣飛更荒涼鹿游臺古
雄圖漫詡算祇剩明璫翠羽儘沈吟問警籌薪膽消歸何處閒凝佇隱
約靈旗欲並蠡巖住溪上有西子祠
隔溪爲范蠡巖岸旁桃李儘無言笑當年效顰輕誤東鄰
舊侶已莫得同車歸去有誰憐貧賤江頭越女

南歌子

四首

隴水梅花落薊門桑葉秋北斗挂城頭關山今夜月望鄉愁
鏡裏顰眉綠尊前諱臉紅無語怨東風一春憔悴盡孰為容

靜夜邀明月清朝對碧泉雲樹伴身閑空山黃葉裏擁秋眠
玉罕湛芳綠銅盤膩蠟黃新起合歡堂三千珠履客自成行

琴調相思引

客裏逢春不當去春那堪風雨更愁人畫闌干畔極目送行雲
欹枕難尋炊黍夢開簾易惹落花塵鷓鴣聲裏腸斷欲黃昏

夜行船

開到荼蘼花事盡剛勝得楝花風信薄醉還醒嫩寒猶在只是落紅成陣
後約芳期嫌未穩灰不盡相思一寸明鏡孤鸞畫梁雙燕應見日長人

困

臨江仙

澹澹韶光三月暮玉鉤簾影沈沈晚風庭院綠成陰馬嘶芳草遠鶯語落花深
記得畫樓南畔見帶羅曾結同心釵盟鈿約杳難尋一春芳訊斷

寂寂不成吟

一萼紅

牆下秋海棠一枝託處幽隱憔悴可憐旅人
觀之宛若越人之見似人也拈白石調賦之

古牆陰有幽花小朶嬌怯不宜簪破苔苔封殘甎石補剛襯寒翠沈沈莫
嫌這秋容冷淡更掩映籬角一籬金小玉鄰家嫣然一笑珊珊步承臨予
亦久傷蕉萃要風晨月夕與徵秋心桃李成蹊荃蓀數化何事枯菀相尋
最腸斷枝頭血淚惜流景容易又蕭森待得紅妝睡醒平已是春深

菩薩蠻

暮雲唱斷陽關句班駝又繫津亭樹殘葉帶霜飛夕陽紅盡時風平帆
影直帆底吳山色潮落海門寬離人江上寒

捐資姓氏

蔣銘三 蔣介眉 陳子修 壽毅成 傅瑞禾 孫源溥 樓景吳

宣鐵吾 蔣志英 陳德法 茅仲復 汪光裕 鄭石君 斯夔磬

蔣志逸 傅國芬 錢又邨 錢遜騮 錢遜驄 張遇春 徐究仁

楊子雨 魏見山 蔣尊第 張一先 詹燕堂 斯耿周 蔡竹安

陳鶴聲 壽劬成 周兆崇 趙世瑞 蔣任賢 陳遜甫 陳仲默

駱察安 趙穉孫 駱春山 潘詠侯 俞屏石 趙澤三 駱茗蒼

金訥如 楊鶴範 何振君 傅味青 趙蝶魂 俞汝諧 鄺坤厚

楊堯坎 宣紀良

諸
暨
圖
書
館



諸暨圖書館
— ZHUJI LIBRARY —



諸暨圖書館
— ZHUJI LIBRARY —



諸暨圖書館
— ZHUJI LIBRARY —

Blue Cyan Green Yellow Red Magenta White 3/Color Black

TIFFEN Color Control Patches



© The Tiffen Company, 2007

Centimetres 1 2 3 4 5 6 7 8 9 10 11 12 13 14 15 16 17 18 19
Inches 1 2 3 4 5 6 7 8 9 10 11 12


諸
既
詩
英

第
四
冊

上海圖書館
SHANGHAI LIBRARY



諸暨圖書館
ZHUJI LIBRARY



Centimetres **TIFFEN** Color Control Patches © The Tiffen Company, 2007

Blue Cyan Green Yellow Red Magenta White 3/Color Black